

茹經先生自訂年譜

附著作年表

無錫國學專修學校學生會校印

26
R

茹經先生自訂年譜

附著作年表

無錫國學專修學校學生會校印

年譜題辭

余弱冠時讀陸稼書湯潛庵張楊園暨吾鄉陸陳諸先生年譜心嚮往之復讀朱子年譜更大好之遂有必爲聖賢之志中年讀羅羅山胡潤芝曾滌笙左季高諸先生年譜志氣發揚更慨然以建功立業爲事然後歎奮乎百世之上百世之下感動興起所以立德立功者必以前賢年譜爲先路之導迺我生不辰運會杌隉立朝之時欲匡君德紓國憂迄無所成退而講學欲正人心維世道亦靡所裨每誦杜工部詩匡衡抗疏功名薄劉向傳經心事違之句輒爲慨然年譜云乎哉惟是師友之淵源學問之次第事變之閱歷著述之積累有不能已於懷者隨筆記錄彙爲一編甲戌歲七十初度同學索觀者甚衆友人侯官陳石遺同年益陽陳君天倪門人陳生柱尊等亦屢以爲言爰屬北流馮生振心校正付印振心復增入著作年表可感也嗟夫王風之詩曰行邁靡靡中心如醉小雅之詩曰明發不寐有懷二人追維往昔內疚孔多矣年譜云乎哉蔚芝唐文治自題

茹
經
年
譜
題
辭

世系

周初封唐叔於晉系出姬姓郡名晉陽吾家遷婁始祖良鼎公譜載明末由金陵遷婁公弟
鼎臣遷崇明將宗譜攜去考其時當在明萬歷天啓之間良鼎公子鳳儀公配楊氏生文正
公妣王氏文璧公妣楊氏禮記曰別子爲祖繼別爲宗茲謹述繼別本支文璧公生子天棟
號宏任公始有遺傳手跡妣顧氏宏任公生子承燾號南軒公妣施氏生子景星號墨池公
嘉慶元年入州學第二名是爲吾宗入學籍之始妣徐氏墨池公嗣子森階號堯奠公 欽
賞八品頂戴候選按察使司知事 誥贈光祿大夫妣胡氏 誥贈一品夫人籓室張氏
誥贈一品夫人堯奠公嗣子學韓號翼亭公 誥贈榮祿大夫妣張氏繼妣王氏俱 誥贈
一品夫人翼亭公子受祺號若欽公咸豐九年入州學第四名補廩膳生乙丑 恩貢候選
復設教諭己未重遊泮水 誥封榮祿大夫妣胡氏 誥封一品夫人若欽公定子孫名以
文慶孝德爲世家祥八字爲次八世後再定子文治號蔚芝光緒六年入州學八年中式舉
八十八年中式進士官戶部主事改官外務部主事二十九年洊升外務部員外郎外務部

郎中改官商部右丞洊升左丞三十二年改商部爲農工商部升左侍郎署理尙書 誥封
光祿大夫配郁氏 誥贈一品夫人繼配黃氏 誥封一品夫人子慶詒美國哥倫比亞大
學外交科碩士配俞氏美國哥倫比亞大學教育科學士次子慶平殤三子慶增美國哈佛
大學經濟科碩士配周氏四子慶永美國哥倫比亞大學經濟科碩士聘錢氏未歸殤配陸
氏慶詒子孝宣慶永子孝威是爲第十二世孫也文治謹述

茹經年譜

太倉唐文治蔚芝自訂

同治四年乙丑一歲

十月十六日亥時生於太倉鎮洋縣境岳王市陸宅之靜觀堂時余家因避粵匪之亂甫於海門遷回由時思菴鄉徙岳市先是壬戌年姊氏文珠生大父望孫綦切及余生喜甚命名曰文治字曰穎侯號曰蔚芝越三朝赴某親戚家飲酒醉懷果餌甚多曰將以遺吾孫也或戲之曰君孫已能啖果餌耶則相與大笑以爲樂

丙寅二歲

是年余家遷城中借居武陵橋南胡宅

丁卯三歲

戊辰四歲

己巳五歲

庚午六歲

是年受業於外叔祖胡嘯山先生之門先生名汝誠邑諸生時設帳楊氏衡宇相對因往受業先識字後讀孝經夜歸吾母恆自課之極嚴

辛未七歲

讀論語是時家貧約吾母甚健縫紉予衣補綴破裂或結數處同學咸姗笑之余語之曰余君子固窮若輩則小人窮斯濫矣同學咸訝之是二語蓋習聞外大父以之訓人者也夜課恆隨月讀書目力已受傷矣

壬申八歲

是年讀孟子

某節日赴汪家二姑母處午飯同座王君穀祊名恩壽詢余志余曰吾願爲伊尹王君大奇之大父聞之甚喜

癸酉九歲

是年余家遷居飛雲橋東秦氏市屋受業於姨丈姚棻翹先生之門先生名葆光邑諸生

爲芷軒太夫子之長君卽胡嘯山先生之壻也余時讀詩經同學陸君庚星名咸清聰慧
絕倫已能詩余與之交後以其狂稍遠之

甲戌十歲

是年讀尙書吾父館於蘇州泖涇鎮李提督靄堂家課其子名景淮字漢秋讀

乙亥十一歲

去年 穆宗升遐今 上卽位本年改元光緒元年

是年隨吾父讀書於李宅夏余家遷居南牌樓趙氏宅余時讀周易

丙子十二歲

春在家讀書夏隨吾父赴上海參觀製造局受業於外大父古愚胡公之門公名汝直邑

諸生時設帳廣東鄭氏余時讀禮記始學作制義及試帖詩 門人馮振謹案先生有

外祖古愚胡公家傳載茹經堂文集卷五第二十四頁又有外祖古愚胡公手蹟謹志載

同卷第三十九頁

丁丑十三歲

是年受業於姨丈錢會甫先生之門先生名宮極邑諸生爲祇文太夫子第四子余時讀左傳

戊寅十四歲

是年隨吾父讀書蘇州方氏主人益齋安徽桐城人其尊人傳書曾任太倉州牧吾父課益齋長子名懷仁字伯元讀余時讀五經畢業

夏王紫翔先生來館訪吾父暢談先生名祖畚癸酉科鄉試第二人吾父之執友也見余文亟賞之謂必成大器且謂宜讀古大家文以擴充其才氣先生去後吾父訓之曰汝尙幼稚稍長當執贄王先生門下也 振謹案先生有王文貞公文集跋載茹經堂文集

二編卷五第五十六頁王文貞先生學案鎮洋王紫翔先生文評手蹟跋王紫翔先生書函手蹟跋俱編入茹經堂文集三編尙未刊

秋始應童子試不售試時得交畢君枕梅名光祖

冬大父捐館舍追念平日愛我教我之恩哀痛之極尙能擗踊盡禮 振謹案先生有

王考府君事略載茹經堂文集卷五第一頁

己卯十五歲

去冬外大父胡公棄養其居停粵東鄭氏延請吾父赴上海教讀卽前余讀書處也同學昆仲二人長名學書字讓卿次名學源字靜卿時家境愈困余益發憤讀書恆至夜分冬應州試首場列七十四名初覆十九名再覆十三名三覆十一名州尊爲吳廣齋先生名承潞浙江名進士也

庚辰十六歲

春學院夏公子松歲試取入州學第六名公名同善浙江仁和人題爲一人定國堯次題文王之民無凍餒之老者詩題賦得惠風和暢得和字同入學者姊丈許君弼承名沐鑠友人張君海民名培堦 振謹案先生有夏文敬公年譜並遺詩後序載茹經堂文集二編卷五第十九頁

是年仍在鄭氏館中讀公羊穀梁傳及史記始學作古文

辛巳十七歲

春因姨丈黃公浚之介紹受業於紫翔王先生之門間三四日前往聽講先生教誨倍至

告之曰文章一道人品學問皆在其中故凡文之博大昌明者必其人之光明磊落者也文之精深堅卓者必其人之忠厚篤實者也至尖新險巧則人必刻薄圓熟軟美則人必鄙陋汝學作文先從立品始不患不爲天下第一等人亦不患不爲天下第一等文並教余先讀汪武曹孟子大全陸清獻三魚堂集並唐宋文醇熊鍾陵制義等余日夜淬勵於性理文學初知門徑矣 振謹案先生有外舅黃浚之先生家傳載茹經堂文集卷五

第二十九頁又有外舅黃浚之先生誄文載茹經堂文集二編卷九第一頁

秋學院黃漱蘭先生科試余列一等十五名先生名體芳浙江瑞安人中興時直臣也題爲其所厚者薄而其所薄者厚未之有也策問太倉形勝詩題賦得一簾秋雨夢吳淞得吳字

冬吾父爲鎮海衛漕糧事因人受過姨丈黃公浚之銳身而出爲排難解紛並爲規畫一切全家感之

壬午十八歲

春正月郁夫人來歸夫人爲吾邑新塘市人外舅名振鏞字銘軒外姑楊氏內兄名朝桂

字擷芳邑諸生

振謹案先生有外舅郁銘軒先生家傳載茹經堂文集卷五第二十

七頁

是年隨吾父讀書本邑城北陸氏主人爲陸君少江名錦采與吾父同門課其子長智賢次智海三智廣四智淵時余學頗精進書毋不敬毋自欺六字於座右行路不斜視務收束身心分日讀朱子小學近思錄性理精義學部通辨程氏讀書分年日程等兼鈔王學質疑明辨錄細讀之覺醞醞有味讀孟子乃更有心得爰摘錄大全諸先儒說並錄王師筆記作讀孟劄記理學乃日進同學有王君晉蕃名康壽王師之從弟也李君虎臣名炳陸君禮南名朝琮相與考德問業深得切磋之益 振謹案先生有王晉蕃先生生傳已編入茹經堂文集三編尙未刊

吾邑城內向無天主耶穌教堂夏四月忽有耶穌牧師吳虹玉自上海來傳教購鎮民橋宋姓房屋行將遷入矣王師聞之謂是不可以啓外侮借邑紳並諸同學數十人往謁州縣尊阻止之余亦隨往縣尊任石芝先生坐大堂判決資送吳虹玉出境償其費撥公款購買宋姓屋改爲鄉先賢陸尊道桴亭陳安道確菴江孝友藥園盛貞介寒溪四先生祠

六月某日修葺竣工余隨吾父吾師恭送粟主入祠邑長老暨同志來者甚多

將赴省試王師示以金陵官書局單囑購讀數種余苦無資內子聞之立出奩具內銀錠數枚交余自赴當舖質之得八金余喜甚遂購性理書數種今家藏二程遺書朱子全書拙修集皆郁夫人奩中物所購也

七月隨吾父赴金陵省試試前余日遊書肆中熱患暑病吾父爲檢理考具入場時人極擁擠汗出而愈題爲子曰小子何莫學夫詩兩章次題尊賢之等禮所生也三題命也有性焉君子不謂命也詩題賦得袖中吳郡新詩本得新字榜發余中式第二十名房師爲安徽知縣林燮軒先生名調陽福建長樂人座師爲侍郎許公星叔名庚身浙江仁和人翰林院編修譚公叔裕名宗浚廣東南海人報到之日吾父吾師均甚喜輿論謂先人焚券之報蓋先曾祖堯莫公當道光年間大水時曾將貧戶借貸之券概付焚如不令償還人以爲陰德也同舉者金君蓬生名簾硯香先生之孫也

振謹案先生有譚叔裕先生墓表載茹經堂文集卷六第三十三頁

冬隨吾父赴揚州籌明歲計偕資見表叔毛平甫名華時爲兩淮鹽知事贈余初印仿宋

本說文解字一部

癸未十九歲

春隨王師赴禮部試寓宣武門外球芝巷太倉會館榜發王師中式入詞林授庶吉士余下第歸

五月姊氏文珠卒姊天性仁孝通翰墨勤於操作乃竟不壽吾父吾母哭之慟吾父輓聯云病由熱中貽誤在醫藥余方冀鬼求食神有靈或者隱與挽回此後依依仍繞膝症已積久忘情輕死生汝可知父漸衰母多病何故決焉舍去相看默默竟無言余與內子舍悲勸慰而吾母肝鬱頭暈之病遂日增矣 振謹案先生有歸高陽姊氏墓誌銘載茹

經堂文集卷五第十五頁

秋友人張君海民卒張君亦從王師遊天資近道喜閱性理書步趨先儒不踰禮法嘗語余曰聖賢之學在躬行先儒有言懈意一生卽是自暴自棄此言最有味余爲悚然起敬焉文章書法亦極工以中暑病卒且無後余往弔之不覺涕泗之橫流也爲錄成遺稿一卷癸巳歲其族人小元出資刊之

秋冬間仍研理學讀二程遺書朱子文集並先儒語錄等書粗有論著然皆不足存也

甲申二十歲

讀周禮儀禮爾雅始從事經學

學政浙江瑞安黃澉蘭師在江陰設立南菁書院以樸學提倡多士畢君枕梅爲余報名寄卷應試

乙酉二十一歲

春偕畢君枕梅張君拙嘉名樹蔘諸友同赴江陰南菁書院應試取超等任院肄業謁見黃澉蘭師諄諄然訓以有用之學遂受業於院長黃元同先生之門先生名以周浙江定海人爲薇香太夫子之季子東南經學大師也聞余講宋儒之學甚喜語余曰顧亭林先生有言經學卽理學理學卽經學不可歧而爲二聖門之教先博後約子其勉之復教余訓故義理合一之旨先假余陳北溪先生字義余鈔讀之踰月而畢又示余所著經義通故後改名經訓比說余亦摘其精要者鈔錄之又於藏書樓縱覽諸書自是於經學小學亦粗得門徑矣

振謹案先生有張君拙嘉傳略載茹經堂文集二編卷六第十九頁又有黃

元同先生學案載茹經堂文集卷二第十頁

交吳縣曹君叔彥名元弼江陰同年章君琴若名際治陽湖趙君劍秋名椿年武進劉君淮生名翰皆一時英俊也曹君精於易禮諸學篤守鄭君家法尤爲純實 振謹案先

生有與曹君叔彥書二首載茹經堂文集二編卷四第三頁又有答曹叔彥書已編入茹經堂文集三編尙未刊又有禮經校釋序載茹經堂文集二編卷五第一頁禮經校釋卽曹先生所著書也又有章君琴若墓誌銘載茹經堂文集二編卷八第三十二頁

作宋元明諸儒主一辨黃師嘆賞不置謂擇精語詳於斯道已得十之七八矣 振謹

案先生所作宋明諸儒說主一辨載茹經堂文集卷三第八頁

課餘作甯波辨志文會宋學課藝主講者浙江劉藝蘭先生名樹人甚器賞余屢置第一且託元同師轉達惓惓余深感之

冬學院王益吾先生來接任先生名先謙湖南長沙人亦名翰林也

丙戌二十二歲

春赴禮部試下第歸黃師函招仍赴南菁書院初治易先讀惠氏張氏焦氏諸書繼請業

於黃師師曰本朝易學雖稱極盛然未有能貫通漢宋自成一家者子讀易當於通志堂經解中求之其中如朱氏漢上易傳項氏周易玩辭吳氏易纂言皆極精當余因細讀之覺項氏易尤勝黃師又假余所著十翼後錄哀然巨帙未克鈔錄思作周易集解疏不果因擬別作周易大義兼採漢宋諸家之說始屬稿焉

夏讀莊子文尙恢詭喜效吾婁王弼州文頗菲薄震川黃師假余評點震川集讀之乃知震川白描處極有精神且得力於歐曾兩家甚多固未可輕加訾議也

交丹徒陳君善餘名慶年常熟孫君師鄭名同康丁君秉衡名國鈞元和曹君夔一名元忠泰州盧君羲侶名求古如皋姚君小賓名彭年 振謹案先生有陳君善餘墓誌銘

已編入茹經堂文集三編尙未刊又有讀經救國論序載茹經堂文集二編卷五第二十九頁讀經救國論卽孫師鄭先生所著也

丁亥二十三歲

春仍赴南菁書院肄業

交寶山邵君心炯名曾鑑係庚辰年與余同入學者天才橫溢豪放不羈奇士也又交陽

湖莊君思緘名蘊寬上海趙君韻丞名世修丹徒殷君墨卿名松年海門劉君乙青名宗向

是年讀書心較靜細始編錄茹經堂文集

易學稍進黃師示余所著周易故訓訂喜甚亟鈔藏之惜僅有上經蓋未成之書也

振謹案先生有周易故訓訂跋載茹經堂文集二編卷五第五十一頁

戊子二十四歲

春仍赴南菁書院肄業

同學泰興于君玉峯名璠華亭雷君君曜名璿咸來問業

王益吾先生刻 皇清經解續編成余曾任校書之役繳半價得書全部

夏日王益吾先生招余入署弈圍棋見國手周小松先生受九子余獲勝

是秋江南鄉闈典試者爲順德李芍農閩縣王可莊兩先生收羅好古積學之士南菁同學獲雋者二十餘人趙君劍秋雷君君曜均與焉友人王君晉蕃姊丈許君弼丞中副車畢君枕梅赴北闈試亦中式大有拔茅連茹之慶

王益吾先生參劾內監李連英遂引疾歸可敬也

己丑二十五歲

春偕舉君枕梅赴禮部試先期吾父訓余曰汝此次會試倘再不售明年尚有恩科會試可暫留京處館以免跋涉余因作留京之計

先是余喜談道講學京中諸人咸疏遠之至是舉君枕梅戒余曰天下安得皆同志子盍慎諸和光同塵可耳余憬然悟爰於周旋世故隨時注意人始不以余爲狂矣

謁座師許公星叔師語余曰汝壬午試卷左文襄公季高大爲嘆賞

左公時任兩江總督

揭曉後將

硃墨卷一并索去細閱並云此人三場字跡一筆不苟必有後福余聞之知己之感縈繞

於懷惜前數年未經謁見耳

公歿於乙酉歲

榜發余挑取謄錄房師爲張子虞先生名預浙江錢塘人三場評語云淹貫諸子百家皆騰躍而出其腕下可稱雄博而主試嘉定廖公仲山名壽恆因補薦太遲額滿見遺余謁張子虞先生爲咨嗟太息久之

振謹案先生有張子虞先生墓表已編入茹經堂文

集三編尙未刊

覓京館頗難得同鄉友人顧君公度名思義乙酉言於其尊人廷一先生延余教讀余欣然往就顧先生名元爵時官直隸候補道會辦大沽船塢爲人淵淵有度喜讀書並喜談吾婁掌故蓋長者也余課其第四子名思永字公亮第五子名思遠字公毅大沽地頗幽靜由天津赴彼處約三百里離海口約五六十里 振謹案先生有顧廷一先生墓誌

銘載茹經堂文集二編卷八第二十二頁

五月考內閣中書余得公度電復赴京既試亦被屏六月出京坐驢車中炎天奔走途遇大雨極爲辛苦

秋聞于玉峯之喪痛悼殊甚玉峯治經學工詞章且學道不倦在南菁書院時依依執弟子禮歿時年僅十九後閱十餘年余爲刻遺稿一卷

生日作思親詩 振謹案先生詩皆未刊

冬間夢吾母肝風病甚劇面色浮腫醒後大戚以周易筮之得坤卦辭曰安貞吉心始稍安作父母在不遠遊制義以自警末云嗚呼行邁靡靡中心如醉得吾父慰勞之語不覺悲從中來冬日烈烈豈曰無衣念吾母縫紉之艱曷禁潛焉出涕然則人子而常依膝下

豈非厚福耶

庚寅二十六歲

春偕公度赴禮部試薦而不售房師爲朱小唐先生名琛譜兄崇明王君丹揆名清穆中式以主事分戶部 振謹案先生有王君丹揆六十壽序載茹經堂文集二編卷七第

十九頁

五月中航海歸廷一先生命思永思遠隨余回太倉仍赴其家課讀顧氏宅在小西門

赴新塘市弔外舅郁公銘軒之喪李生頌韓名聯珪來受業 振謹案先生有與李生

頌韓書載茹經堂文集二編卷四第十一頁

弔金氏姨母之喪姨母爲外叔祖胡公六符次女與吾母情意契合如同胞適州庠生金

君仲德名庭筴本年三月間金君病卒姨母遂殉節而死吾母痛甚余爲作家傳一首

振謹案先生所作姨母胡孺人家傳載茹經堂文集卷五第三十二頁

友人陸君庚星卒余往弔之庚星少年頗狂放後食廩餼深自檢束復與余親亦考取南菁書院春間其弟先卒夏庚星亦歿婦陳氏殉節死其堂上父母俱存且無後余題其遺

像爲之潛然後閱十餘年爲刻遺稿一卷

是年吾父館本邑縣署縣尊爲吳粵生先生名鏡沅河南光州人吾父課其子名敬修字菊農極篤實用功 振謹案先生有吳粵生先生六十壽序載茹經堂文集二編卷七

第九頁

冬十一月初二日吾母生辰遷居武陵橋南王姓宅居停王某開設王大吉藥肆於上海屋有廳內室三楹惜俱西向有廂房西北有小樓一角可庋藏書籍後門通九廟前河沿前居之趙家廳屋小而鄰雜時聞詬詈聲余家厭苦之久矣願以住彼十數年遷居時頗覺戀戀余夜間恆夢在是屋中人之不能無情如此哉

辛卯二十七歲

是年仍館顧氏表弟黃君玉儒名彬琳陸生鷺卿名長序來受業陸生星農先生之孫也時州尊程序東太夫子名其珏吾父壬午科鄉試薦卷房師也與吳縣尊提倡文藝月課優給膏火頗極一時之盛姚棻翹先生之世兄柳屏名鵬圖內表陸君彤士名增煒皆年少聰穎文名籍甚柳屏卽於是科秋闈中式 振謹案先生所作禮經校釋序見前自注

云代程序東太夫子作先生又有姚君柳屏傳略載茹經堂文集二編卷六第二十三頁
壬辰二十八歲

奉隨王師並偕金君蓬生姚君柳屏赴禮部試時頗艱於賞得程序東太夫子贈五十金
始克成行心甚感之王師自入詞林後本無意進取因前與姚芷軒太夫子有約云柳屏
領鄉薦吾當偕同赴京至是遂踐言焉

榜發余中式第三十一名貢士題爲君子矜而不爭兩章次題斯禮也達乎諸侯大夫及
士庶人三題井九百畝其中爲公田八家皆私百畝同養公田詩題賦得柳拂旌旗露未
乾得春字房師爲沈子封先生名曾桐浙江嘉興人座師爲翁公叔平名同穌江蘇常熟
人祁公子禾名世長山西壽陽人李公苾園名端棻貴州貴陽人霍公慎齋名穆歡滿洲
人

謁沈師師云首場未薦閱二三場卷知爲讀書有得之士補薦遂中翁師評語云經生之
文必有靜穆之氣此作是也經藝淵雅不使才鋒策賅博

覆試二等題爲大匠誨人必以規矩詩題賦得學如鳥數飛得如字殿試二甲第一百五

名朝考一等第六十五名題爲廷尉天下之平論審樂知政疏詩題賦得江心舟上波中

鑄得中字

余詩點題云萬派江心景都歸鑄造中舟浮天上碧波映日邊紅

引見後以主事用籤分戶部江西司故事凡列

二甲一等者均入詞林余失之意外頗覺悵惘王師慰之曰子何不達之甚子家况清寒部曹有印結款津貼可不取分外之錢此天之玉汝於成也子何不達之甚余聞言釋然謁許星叔師以余未入詞林代爲抱屈又述左文襄公之言再三勸勉深爲可感

六月翁師延余至其家課讀學徒二皆翁君叟甫名斌生丁丑翰林之子長名之潤字澤之次名之廉字景之天資俱極聰慧之廉爲翁師嗣曾孫

受業於嘉興沈子培先生之門先生名曾植庚辰進士子封師之兄也博雅閎通當世殆無匹焉 振謹案先生有上沈子培先生書載茹經堂文集二編卷四第一頁又有沈

子培先生年譜序題先師沈子培先生手蹟後均編入茹經堂文集三編尙未刊

王師散館得知縣分發河南後補湯陰縣暫館同鄉陸蔚庭先生名繼輝家余時往候起居師

著左傳考釋成命余作序 振謹案先生有書左傳考釋後載茹經堂文集二編卷五

第六十四頁

八月請假回籍吾母患肝風頭暈之證不能起床者六七年矣請浙江醫生沈雲程先生診治沈素崇拜薛生白先生奉醫經元旨爲準繩進以白鳳丸頗見效至是已能起床大喜逾望

弔外大母陳太夫人之喪初外大父母有子名秉彝壬戌年避難滬上病卒乃以外叔祖六符公之子景珪爲嗣外大母素愛余乃以四月初旬棄養既未知余捷音而余亦未得一侍湯藥深可痛心

癸巳二十九歲

吾鄉庚申粵匪之亂鄉民集義勇皆以白布裹頭爲號一時響應號稱十萬與匪戰於東門外之板橋匪悉精銳突出鄉民不知戰法大潰敗死者數萬人至是邑人沈君馥林就其地作亭爲紀念余爲作碑文記之
振謹案先生所作太鎮官紳義勇殉難瘞骨碑

載茹經堂文集二編卷八第三頁

正月偕表弟黃君玉儒李生頌韓顧生公亮赴南菁書院謁黃元同師不值隨偕曹君夔一赴常熟曾君表先生名之撰偕其世兄孟璞名樸又翁君又申名炯孫徐君少達名兆

燁等慇懃接待卽住曾氏虛靈園盤桓三日閱其所藏書籍並遊虞山題名刻石於劍門
三月迎養吾父吾母並挈內子如京師先至上海住八仙橋表姊丈俞君隸雲宅俞君名
書祥邑諸生爲顧氏大姑母長壻時大姑母亦就養俞君處大表姊極賢孝與吾母最契
合親戚情話歡樂無涯小住數日卽乘輪舟赴天津幸途中無風浪抵津後住中和客棧
胡疇生母舅時在大沽船塢司事余懇伊來照料一切遂入京翁君弢甫爲賃屋於東城
新開路西頭路北那宅時翁氏住東單牌樓二條胡同往來極近惟用僕媪語言不通吾
母起居頗覺不便余赴翁宅課讀間一二日到部視事

秋吳菊農世兄中式河南鄉試常熟孫君師鄭友人沈君頌棠名鵬中式北闈鄉試太倉
王君彬儒名鳳璘顧生思永中式江南鄉試 振謹案先生有王君彬儒傳載茹經堂
文集二編卷六第二十頁

冬十二月外姑楊太夫人棄養內子聞耗哭極慟

甲午三十歲

春禮部試孫君師鄭吳君菊農沈君頌棠均聯捷入詞林

寶應劉生翰臣名啓瑞來受業生爲戶部同司劉佛卿年丈之子經學世家品詣篤實後成進士以內閣中書用

振謹案先生有劉佛卿先生神道碑載茹經堂文集二編卷

八第七頁

秋八月內子郁夫人卒內子天性婉婉淑慎孝和而儉吾母疾病侍養彌謹諸事能忍耐戚黨皆稱其賢來歸十三年去冬懷妊吾母甚喜余筮之遇明夷之賁其繇曰不明晦初登於天後入於地余心惡之至是竟以產難卒吾母大慟停靈於崇文門外之夕照寺時在客居喪務均未諳悉賴譜兄王君丹揆來照料一切並偕其夫人及二女時來慰藉吾母可感之至

振謹案先生有郁夫人家傳載茹經堂文集卷五第十七頁

中日失和提督葉志超與日人戰於高麗之平壤輒敗走敵勢益張冬遂侵入奉天金州復州海城蓋平皆陷旋旅順亦失守風聲鶴唳勢且擾及津沽時吾母臥病床榻曰設有不測吾當投繯以報國余因國禍家難抑鬱無聊時讀易以自遣

高陽相國李公鴻藻暨翁師俱入掌軍機余擬上封事計萬餘言翁師激賞之手自鈔出數條然當事者不能行也沈子培師及京中諸友均傳誦此文

振謹案此卽請挽大

局以維國運摺載茹經堂奏疏卷一第一頁先生自記云此稿翁叔平沈子培兩師深加歎賞稱爲萬言疏稿惜兩行痛淚無補時艱也

乙未三十一歲

仍館翁宅課讀翁生綬珩來受業生字玉行內閣中書翁君印若名綬琪之弟蘇州人

三月李少荃相國名鴻章赴日本馬關議和日人要挾高麗國自主割臺灣與日本並索償兵費二萬萬同鄉公車汪君仲虎等謀上書力爭之余爲代擬上察院呈然當事者以事機日迫莫可如何和議遂成旋臺民擁總督唐維卿名景崧者獨立卒無成就痛心曷極

聞邵君心炯之喪爲慘然者數日邵君因不得志縱情詩酒卒以蚤夭其自挽聯云見性明心立地成佛好學短命何敢望回蓋是年三十一也歿後姚君子讓柳屏等爲刊艾廬遺稿 振謹案先生有邵君心炯傳載茹經堂文集二編卷六第十七頁

蘇州王君澐卿名頌蔚時掌戶部雲南司白於翁師調派余爲雲南司幫主稿蓋王君丹揆所介紹也雲南司管理滇省財政兼管漕務倉務余時於公牘文字尙無門徑祇得以

吏爲師遇事諮詢並與丹揆協商調取檔案目錄手自鈔存用時指出提閱吏不能欺丹揆作職思隨筆辦稿必摘要鈔錄余亦仿行之

吾父輯太倉陸桴亭先生遺書告成初桴亭先生遺書傳於世者不過思辨錄前後集及太倉葉涵溪先生名裕仁所輯文鈔數卷而已吾父於小石山房叢書中輯得論學酬答四卷於婁東雜著中輯得性善圖說等三種又於葉涵溪先生家中鈔得八陣發明一卷詩集若干卷又鈔得張清恪公所輯文集若干卷又編訂年譜一卷共得二十冊合思辨錄共二十八冊先後募資授刊

十一月繼室黃夫人來歸伯岳黃澄之先生暨內弟玉儒親送來京

十二月學習期滿戶部循例引見奏留翁師考語云人品端方趨公勤慎

丙申三十二歲

閱各國條約事務各書並評點萬國公法及曾惠敏黎莼齋諸家文集自是於經世之學亦粗得門徑矣

七月考取總理各國事務衙門章京第二名試策問一道引見後記名傳補首列爲會試

同年張君菊生名元濟友人李君槃碩名審之汪君伯堂名大燮及丹揆兄均前列時翁師掌總理衙門先期見沈子培師詢問各部人才子培師首以余對翁師頷之曰唐某學問性情品行無一不佳余聞斯言愧無以對知己也

丁酉三十三歲

閱經世文正續編及曾文正胡文忠全集經世文正編選擇極精論學二卷尤極純粹續者遠不逮矣

戶部設則例館余奉派爲纂修官輯成漕運門八卷

購得蘇州周忠介公順昌燼餘集三冊係湯文正公斌撫蘇時所刻真難得之書可寶之至爲集資刊印之 振謹案先生有重刻周忠介公文集序載茹經堂文集卷四第九頁

六月吾母忽患中風不能言語急延醫診治踰日漸蘇遂成半身不遂之症不能起床自問侍奉無狀悶恨之至

夏李生頌韓來將應京兆試卽住余家

崇明朱生貫微名誦韓孫生字晴名昌烜來受業字晴余會試同年孫子鈞吏部名培元之子

冬沈子培師假余無錫高忠憲攀龍未刻稿八冊云得自河南書肆中蓋當時陳檣亭先生輯高子遺書所未錄者也其中論學精粹處極多余喜甚手自鈔錄二冊爲序其首並屬朱孫二生各分鈔數冊 振謹案先生所作高子外集序上下二篇載茹經堂文集

卷四第二十一頁

序誤作子封先生

戊戌三十四歲

二月長子慶詒生字曰郁生欲其不忘前母也號曰謀伯內子產後大病類瘋癲延山東醫生李葆初診視云是肝鬱血枯痰壅所致先投以川軍芒硝大瀉後神色稍清復進以補血消痰之劑半年後始全愈

擬謹殫血誠以維國脈摺附請停止搜括之政片又代沈子封師擬謹陳管見以固人心摺 振謹案首摺載茹經堂奏疏卷一第二十頁次摺載同卷第二十七頁先生日記云此稿係沈子封師囑爲代擬中間正人心簡使臣兩條卽用萬言疏稿成說稍加增損

云云

閏三月初四日爲吾父五十八生辰吾母適年六十稱觴於東城之德興堂

同鄉內表弟陸君彤士會試中式第一名友人趙君劍秋亦中式

四月翁師奉 旨開缺回籍蓋與滿大臣榮祿剛毅不和爲其所構陷也五月卽出京余

送至正陽門車站黯然而別此後竟不得復見矣

六月傳補總理衙門章京時掌總署大臣爲慶親王及相國合肥李公次爲王相國夔石名文韶及滿洲敬止齋尙書名信廣東張樵野侍郎名蔭桓凡五人先派余在電報處譯機要電文旋派在司務廳收發文牘時總辦章京四人滿洲舒君春舫名文四川童君瑤圃名德璋滿洲瑞君鼎臣名良蘇州顧君康民名肇新顧君素長於公牘文字與余尤相得余詢以辦事之要顧君曰勤而已矣勤則諸事接洽至公牘之要縱使千條萬緒不過敘述明晰無他道也余自是於翁氏館不能兼顧遂辭退深愧無以對翁師也 振謹案先生有記和碩慶親王事載茹經堂文集卷六第一頁又有祭和碩慶親王文載同卷第四十二頁又有記王文勤公事載同卷第九頁

時奉 詔令閣部大臣保舉人才倉場侍郎劉公博泉名恩溥留心物色以余列入薦章余初未之知也後友人傳述至爲惶悚劉公官御史時直聲甚著爲人謙抑異常余以避干謁未往見後公遽歿始詣靈前一慟知己之感思之輒爲惘然

八月政變禍作爲吾國一大關鍵先是 皇上壹意維新勵精圖治內外大臣交薦康有爲梁啓超破格擢用又特拔楊銳劉光第林旭譚嗣同爲京堂在軍機處行走革故鼎新之 旨幾於無日無之會有蜚語謂康梁等將用兵圍 皇太后求變法於是 皇太后復出訓政逮楊銳等寘諸法而康梁則已聞風遠逃不知所往維時波及者爲李蕊園師張樵野侍郎文芸閣學士等李張均革職發遣文則逃匿未獲而張君菊生亦因上疏言事革職豈不冤哉

九月浙江徐嘯雲尙書名用儀袁爽秋京卿名昶滿洲聯敬卿名元均奉 旨派充總理衙門大臣袁公博雅閎通一見余似舊相識

冬浙江許竹簣侍郎名景澄自歐洲歸奉 旨爲總理衙門大臣深器重余以所印外國司船表帕米爾圖見贈

己亥三十五歲

日本索福建鼓浪嶼俄國索山東廟羣島義國索三門灣徐許兩公均力拒之余隨寫問答時同事者蘇州鄒君紫東名嘉來松江雷君譜桐名補同浙江汪君伯棠名大燮均極相契也槃碩丹揆兩兄亦傳補進署

余每兩日赴戶部兩日赴總署戶部在雲南司正主稿上行走事務殷煩總署尤甚值夜班恆至天明司務廳儲條約櫃余發而讀之又以暇時學習俄文燈下每取中俄文條約對較之目力遂大受傷後雖悔之已無及矣

交滿洲世君伯先名善世君爲戶部雲南司掌印紹丈敘五名彝之姪伉爽豪邁懷大志時傳補入總署見余遂通譜焉 振謹案先生有滿洲二友傳一爲世君伯先一爲瑞

君裕如傳載茹經堂文集二編卷六第十三頁

冬余與丹揆兄俱改派在英股辦事

十二月內弟黃彬瑞在俄文學堂暴卒可痛之至余爲殯殮一切停靈夕照寺
歲杪奉 皇太后慈諭立端王載漪之子溥儀爲皇太子聞 皇太后將廢立 皇上爲

慶親王所知跪求四時許事始寢

庚子三十六歲

吾父六十歲三月四日聊具杯酒稱觴焉

四月北京義和團禍作義和團爲八卦教流派邪教也自言能避刀鎗火礮以仇洋教爲名焚燒殺掠初起於山東巡撫袁慰亭名世凱禁之而山西巡撫毓賢加以提倡遂蔓延至直隸總督豫壽山名祿陰袒之勢益張時 皇太后甚惡西法欲集合其力以驅外人各國公使嘖有煩言大臣許景澄袁昶上疏力爭之俱留中不報五月義和團遂糾合大衆拆毀鐵路直入京城圍攻使館及西城西什庫教堂時余家尙居新開路與比國使館相近見火光燭天鎗礮聲疊疊如貫珠吾父偶詣庭中鎗子從頂上飛過險極家中所用某媪並攜有幼女忽閉門而泣詢之則亦教民也余亟慰之給以錢米遣之還踰日見教堂焚毀數處濃烟四合維時天津已與各國開戰南歸路已斷譜兄伯先招余遷至其家余因稟商堂上決計遷避時吾母臥床內子亦懷孕乘輿踉蹌以行世宅住寶鈔胡同內王佐胡同伯先兄夫婦懇勸接待情極可感余家驚魂得稍定焉

拳匪攻使館不克遂燒正陽門及東西荷包巷是皆京城精華所聚商賈逃亡日爲之變色旋提督董福祥亦以勁兵來攻使館時使館守兵不過數百藏地溝內官兵每至界線內輒中鎗礮斃以故卒不能克西什庫亦如之可嘆亦可笑也戶部已在戰線之內改在內廷國史館內辦公

五月中旬風聲日迫余偕世宅遷避至北山平義分村出北直門十餘里爲雷家橋又三十里爲高麗營大市集也又二十里爲平義分村乃昌平順義兩縣分界之地世宅居村外祠堂內余家賃居村中屋僅三間卑隘之至房東張姓其兄在田嘗讀書入庠余家飯食先由世宅供給後與房東商定借竈自炊佈置粗定余乃入城辦公

拳匪愈聚愈衆日本使館書記生杉山彬德國公使克林德赴總署途中均爲拳匪所殺端王載漪莊王載勛奉旨充總理衙門大臣二人皆提倡拳匪者也莊王宅中並設立壇所其時各國已有聯兵攻北京之議有識者皆引爲大感而皇太后爲載漪等所脅依違兩可皇上更不敢言某日召廷臣會議載漪載勛等力言主戰皇上執許景澄手流涕而言曰此時可戰乎汝宜直言載勛厲聲曰許景澄執皇上手是何規矩太常

寺卿袁昶曰是 皇上執許景澄手非許景澄執 皇上手許惶急曰求 皇上釋手乃叩頭退隨有 旨命許景澄宣慰使館蓋許袁二公之殺機已伏於此矣

拳匪揚言總署通洋人蓋意圖劫掠也總辦諸君互商白莊王即請義和團守衛本署某日余赴總署同事者無一人余飯畢散值已出署矣瞥見大隊拳匪約數百人首裹紅巾手持白旗大書扶清滅洋四字自西而來蜂擁入署署中蘇拉即茶房急追余車謂義和

團至須招待余因折回立大堂中招呼之旋至西廳見所謂大師兄者係滿洲某腰繫黃帶怒形於色云貴署堂官無一人司官僅足下招待何故余曰本署係兼差堂官午前均赴各部午後始克到署請暫待某云吾觀署中妖氣極盛聞同文館洋文書極多均須燒燬倘有通洋語者即係奸細須立時殺却吾先告足下知之余曰本署係奉 文宗顯皇帝諭旨所設立因與洋人交涉故不能不通洋文至殺人一事卻須斟酌如果奉有 上諭自當遵辦惟殺人自有地方應由本署交出依法辦理卻不能即在本署自由殺人某語塞乃云吾爲足下焚香升表表上升某云足下卻是好人余付之一笑旋許公竹簣到署余往稟白一切復隨同往見某亦爲許公焚香升表有頃同事滿洲文某來素信義和

團之人也余與接洽後急散值歸已薄暮矣是後義和團戕殺教民甚夥聞之極爲痛心時未敢明言後補作紀庚子冤獄一篇以誌羅織之慘
振謹案先生所作紀庚子六月冤獄載茹經堂文集卷六第十八頁

六月二十七日謁見許公竹簣公神氣頗慘沮憂形於色絕不言疏諫拳匪事但言此次洋兵入京條款必格外苛刻君等宜早爲預備辭出後又謁見袁公爽秋袁公氣象激昂議論踔厲亦絕不言上疏事詢余堂上起居云君旣遷眷至北山目下隻身在京何不遷至傲寓我須與君細談桴亭先生之學況此間爲君舊居停地
時袁住東單牌樓二條胡同即前翁氏宅望卽日遷來余告以世宅起居較便至講學一節當隨時踵門請教懇勸鄭重而別蓋余心知二公禍之將及而不料其卽在旦夕間也

本月杪前山東巡撫李鑑堂名秉衡奉 召來京余向其親戚某探問意旨某云李公將招山東大刀會入京余聞駭極

七月初一日奉 旨逮許袁二公下獄聞係李秉衡所搆陷也惟時總署人入自危不敢前往探視至初三日奉 旨宣二公於法聞二公臨刑時神色灑然監斬者爲大學士徐

桐之子刑部侍郎徐承煜亦附和拳匪者也袁公載手罵徐曰國家之事被汝父子敗壞至此吾在地下候汝許公止之曰爽秋何必如此遂從容就義焉嗚呼自我 聖祖 世宗以來未嘗有殺戮忠良之事此時許袁兩大臣被禍蓋國家元氣因此大傷而人心亦自此漸去矣 振謹案先生有記徐桐崇綺事載茹經堂文集卷六第十五頁

余奉派署雲南司正主稿又奉派在內廷譯密電間日住班丹揆兄亦共事軍書旁午時天津已失守矣

七月初十日奉吾父手諭悉丙子產一子取名慶平命余赴鄉省視逆料西人用兵慎重未必卽下通州到京尙須時日因與丹揆兄約請其暫代於十二日赴北山大小平安頗以爲慰乃十六日接同司紹敍五丈急信謂洋兵已入通州戶部尙書王公夔石擬將倉存米穀全行發放囑余速赴京十七日早乘車至雷家橋但見大隊義和團向北逃竄云洋兵已入京城 兩宮未知所在車夫遂不敢前進余告以設有不測吾當賠汝車輛車夫云車輛可賠性命不能賠堅不肯往不得已退回北山十八十九兩夜遠望見京城中火光燭天蓋洋兵實於十八日入京 兩宮於是日始西狩也又聞前數日奉 旨逮捕

總署大臣徐公用儀聯公元內務府大臣立公山均寘之法蓋亦端王等所構陷也爲之駭嘆不置

時亂兵逃潰各處搶掠初鄉民相約在山溝中搭篷十數間遇急難時往避余爲出資助成之臨時房東張姓云山路崎嶇老太太決不能往內子聞之云吾姑旣不能往余決無言去之理吾父云如此則合家併命可矣乃郁兒乳媪劉姓堅欲攜兒往避不得已書郁兒姓名裹於衣內飭乳媪領去悲痛之極無可言者乃踰日早乳媪抱郁兒悻悻然歸云是兒終夜啼哭爲鄰人所不容故攜之歸詎料是晚亂兵卽赴山溝搶掠一空並將婦女擄去房東奔竄而回如喪魂魄乃知郁兒之啼哭有由也吁亦險矣哉

世宅祠堂內亦被搶伯先兄及友人陳君子久

名恆慶工部郎中與伯先兄同避難者

匿高梁中余囑鄉民導

往探視伯先兄目直視云君亦不免何爲冒險而來余急慰之是晚伯先兄攜眷避往高麗營亂兵十餘人卽盤踞世宅祠堂中揚言將至村中搶掠或與通款乃得免越數日赴某村搶劫爲村人擊斃數名僅六人歸鄉民謀圍斃之余語張在田曰亂兵雖少然有快鎗不可輕敵轉致肇禍乃謀賄通其馬夫當午飯時先將快鎗從牆隙中遞出鄉民劉姓

父子爲前鋒用烏鎗一擁而入立斃亂兵三名餘三名踰牆逃出余曰此禍根也急囑鄉民各處尋覓傍晚於山溝及高粱地中先後覓得俱擊斃之其患乃絕然其時風鶴頻驚某日又有潰兵來村中先至張在田宅旋至余家眷口先避匿余出迎之兵曰吾輩來覓牲口耳在田曰牲口已爲他人掠去矣兵遂去舉家慶幸焉

八月十日聞慶親王與相國合肥李公奉旨爲全權大臣與各國議和余急欲赴京擬先往高麗營爰與鄰人武庠生趙某商借車輛趙某謂距高麗營七八里有盜匪盤踞時出劫掠不敢往余曰吾文人膽尙大若武生何膽怯乃爾趙不得已曰車輛決不敢借騎驢可乎余曰可乃於十三日早起程同行者趙某及僕人李升途中行人斷絕將至高麗營瞥見盜匪三人自對面來各騎快馬攜快鎗飛駛而至余輩不敢退與摩肩過其爲首盜匪問余曰往京城乎余頷之曰然盜遂去旋聞其同夥問爲首者曰認識此人耶曰此是城中唐老爺如何不認識余深訝之至高麗營見伯先兄及陳君子久均無恙中秋夜同酌酒啖月餅可謂苦中得樂矣余與伯先兄商同赴京伯先兄遲回不決余因於十九日偕伯先堂弟輝山先行赴京至雷家橋南步行至北直門爲日本兵所阻不得進爰繞

道進朝陽門途中但見洋兵運物氣象愁慘余逕赴新鮮胡同紹敍五丈及其弟越千丈均大驚異曰君竟能來耶亟留余宿告余洋兵入城時狀並示余大小礮子數枚相與咨嗟久之時無菜蔬晚飯醬蘿蔔一味而已是日余步行三十里許困憊已極夜足痛發熱幸卽愈

二十日赴總署臨時公所卽在總辦施君春舫宅中蓋外國兵入城時施君與總稅務司赫德通函請其介紹議和赫許之時慶親王已隨扈西行由總署章京樸壽追請返京慶親王奏聞遂與李相國同奉全權大臣之命時李已到京住東城賢良祠余謁見慶親王後隨同辦理條約文件越數日總辦瑞君鼎臣顧君康民及丹揆兄諸人均陸續到京相見之後悲喜交集時戶部亦設臨時公所於東城尙書敬公止齋派余爲留京辦事隨員整理一切

十月中余赴北山迎吾父母偕同伯先兄挈眷返京時京北盜匪充斥余同伯先兄雇保標十一人計費百金啓行後忽一人單騎過余曰唐老爺連日辛苦消瘦多矣余見之卽向在高麗營所見之盜匪也亟與通談始知其人姓楊名七卽高麗營人蓋余在高麗營

時常在伯先兄所開什物肆中間坐楊七來購物余亦加以禮貌渠因而感余乃知當亂世時謙德爲尤要也中途過一村名泗兒上有巨盜單刀李五盤踞其地車過時李五出與保標絮語片時旋保標來告余謂李以余攜帶衣箱銀錢必多請留下余告以衣箱內不過當差衣服儘可開視倘有銀錢卽當奉贈爰啓視之皆舊衣書籍李無言余遂行乃知行路帶衣箱最易爲人所覬覦也 振謹案先生有紀庚子遇匪遇盜事載茹經堂

文集卷六第二十頁

次兒慶平殤患難之餘不勝痛惜之至

奉 旨昭雪許袁徐聯立五大臣冤案開復原官旋許袁徐三家屬盤桓回籍各使館派兵送行儀仗極盛總署諸同人設靈路祭有泣下者余作五忠詩弔之袁公詩結句云流水高山今已矣天涯何處哭鍾期蓋不勝知己之感也後外交部陸子興總長建四忠祠於署後刻余詩於壁間以資紀念自是余夜間常夢許袁兩公被刑狀輒大哭而醒淚漬枕上蓋肝鬱日疾愈深矣

洋兵焚燒端莊兩王府第日本兵並捕軍機大臣啓秀刑部侍郎徐承煜二人鎗斃之以

其提倡義和團也初許袁兩公被害前一日慶親王跪求 皇太后赦免不許急往求大學士徐桐謂得公一言可勝余數百言徐曰我看此等人多殺一個好一個慶親王含淚而罷迨承煜啓秀被戮時總署江陰陳君夢陶名名侃謂承煜之弟某曰此方是多殺一個好一個嗚呼何相報之速耶亦可爲後世之鑑矣

余建議停廢河運並裁撤津通運米駁船改歸陸運所有每年河運費四十餘萬兩悉行解部以裕度支合肥李公見余稿頗爲歎賞奏上奉 旨報可

滿洲那琴軒侍郎名桐掌戶部派余爲北檔房總辦蓋全國財賦總匯之區也同事者滿洲瑞君裕如名豐明敏開通與余一見如故因訂交焉

辛丑三十七歲

時正與各國議和余隨辦和約事宜仍兼在戶部辦事勞頓殊甚

四月間同譜世伯先兄 簡放浙江衢州府知府把酒話別不覺相對流涕蓋交情深摯兼在患難之後也余家由王佐胡同遷至東城新鮮胡同紹宅敍五越千兩文接待慇懃深爲可感

七月間和議大綱初定奉 旨派醇親王載灃爲德國專使戶部侍郎那桐爲日本國專使蓋因拳匪前殺德國公使克林德又殺日本國書記生杉山彬故 命往道歉也那侍郎奏調參贊四人顧君康民名肇新蔡君鷺卿名源深張君載初名德彝陶君杏南名大均又隨員四人誠君玉如名璋來君憶亭名存王君嘯侯名念曾余亦與焉七月十七日起程二十日至上海寄亭七叔並姊丈許君弼丞內兄郁君擷芳內弟黃君玉儒等均赴滬相候歡然道故余隨那欽使住天后宮 振謹案先生有奉使日本國記自注云代那大臣作載茹經堂文集卷六第二十三頁又有七叔寄亭公家傳載茹經堂文集卷五第二十一頁

去年拳匪難作全家遷避後余有兩事至爲迫切一前數年刻陸桴亭先生遺書及周忠介公集板片藏琉璃廠龍雲齋未知曾否燬失二內子郁宜人及內弟黃彬瑞靈柩停城東崇文門外夕照寺未知曾否損傷去冬往訪則均無恙深爲慶幸至是印陸子遺書數十部分送太倉同鄉又先期命家人李福運送兩柩回南乃以葬務託寄亭七叔一諾無辭至爲可感

八月朔日放洋四日至長崎五日抵馬關六日抵神戶改乘火車至橫濱旋抵東京住帝國飯店我國駐日公使爲李君木齋名盛鐸參贊黃君伯雨名以霖亦紫翔先生門下士也均赴車站歡迎日本政府招待亦極周至

八月中旬遞國書後遊各處學校並博物館又往游日光山秋色妍麗風景絕佳余特爲文記之 振謹案先生此記尙未刊後略刪節載入英軺日記中

日本立國大抵兄英師德雖係帝制而其大政均裁自內閣近年以來壹意整理海陸軍及工商事宜駸駸乎日臻富強其民外和易而心計極工然廠肆林立軌道四達佔農田頗多米價騰貴亦可慮也語詳東瀛日記中 振謹案先生此書尙未刊

九月初起程回國余於五六月間用目過勞已覺不支八月間目瀉殊甚歸途至橫濱車次左目忽起黑翳請日本醫生左本隆資診視曰無妨也乃越日眼珠內陷一星期後竟無所見矣

抵長崎後改乘招商局新裕輪船賬房許君楚卿太倉同鄉也人極幹練照料周到舟中忽遇表母舅陳君玉森譜兄曹君夔一並太倉同鄉陳君子馨皆來游日本者異國相逢

歡抃之至玉森表母舅變一譜兄偕同人京

回京後仍供職戶部總署戶部各堂派余幫辦捐納房或以爲優差余心甚厭之書吏來白事余盡諾而已

時大局粗定 諭旨大裁書吏廓清弊竇檢查雲南司書吏共三千餘人余與丹揆見定期考試實到僅四五百人取定六十人先期有老吏爭於余前曰若果考試吾輩將盡去余告之曰邇來時局變更汝輩生計甚苦不如改作他圖若慮無人辦事余能自爲之老吏無言而去各堂亦爲余危且謂終辦不到乃考試取定後翕然無詞各司遂有仿行之者

那侍郎因赴日本勞績奏保文治奉 旨賞加四品銜以主事遇缺卽補

冬總理衙門議改爲外務部設管部王大臣一人尙書二人侍郎二人左右丞二人左右參議二人分設四司曰和會司覲見交際等事屬焉曰權算司通商關稅等事屬焉曰考工司路鑛等事屬焉曰庶務司教案等事屬焉分設每司郎中二人員外二人主事二人計共二十四人又候補員二十四人旋 簡派慶親王管部王公夔石名文韶瞿公子攻

名鴻禧爲尙書齊公晉齋名壽朋聯公春卿名芳爲侍郎瑞君鼎臣名良顧君康民名肇新爲左右丞陳君夢陶名名侃紹君任庭名昌爲左右參議先期有人告余慶邸將補余外務部主事而戶部那侍郎屬瑞裕如譜弟告余就戶部爲宜並言捐納房可聯任二年日後京察一等可望簡放余以素性喜研究外交學婉言謝之旋補外務部權算司主事得幫掌印差至是不復赴戶部然余與裕如諸知交相離頗覺惘然

十一月三子慶增生字曰采生號曰叔高姊丈許君弼丞友人王君滬生名開元來京留住紹宅相敘甚樂

壬寅三十八歲

是年五月英國君主愛惠將於倫敦行加冕之禮愛惠者英女主維多利亞之子也維多利亞率愛惠即位逾年行加冕禮先期外務部奏 聞奉 旨派固山貝子銜鎮國將軍載振爲專使大臣赴英致賀旋法比美日本四國均請載大臣前往遊歷大臣慶邸之長公子爲人開爽靈敏幹練有爲兼謙恭下士慶邸詢問外務部左丞瑞君鼎臣孰可隨往瑞君以汪大燮與余二人對於是載大臣派梁君鎮東名誠爲參議汪君伯唐名大燮爲

頭等參贊黃君子元名開甲楊君朗軒名來昭爲二等參贊余與陶君杏南名大均李君佑三名經楚爲三等參贊劉君紫升名式訓吳君盈之名應科潘君劍雲名斯熾爲繙譯余遂偕同汪君伯唐謁見載大臣並檢點外務部緊要公牘預備帶往時各國使館均邀請敍會酬應尤繁

二月中葡界約議起按照中葡舊約有十年後修改之議本年適值改約之期葡使因去年新約賠款關係中國整頓關稅實行值百抽五而葡國因庚子年無損失並未得有賠款而葡商轉受值百抽五之損失故特來照會聲明須推廣廣東舊界謂大孤小孤等島嶼係屬于葡界島內範圍應均劃歸葡國管轄各堂與承參因葡使藉端要求詞氣強硬堅決頗爲棘手余謂此事不難應付按中國輿圖並無此島屬於彼島之例故十年前舊約卽係一定界限如果彼此聯屬則從前訂約時葡國何以絕無爭論現在自應遵守舊約不必更改至值百抽五各國一律與分界毫無關涉不得因此要求也右承瑞君鼎臣聞之大喜立促余屬稿照覆越數日瑞君聞使館中人云近來外務部辦事何以竟能強硬如此葡使接照覆後至氣忿成疾矣余謂瑞君交涉事終須援據公法準情酌理不獨

對於弱國當然對於強國亦宜如此彼自無理焉得不折服乎

三月初四日隨同載大臣啓行是日適吾父生辰也是晚抵天津登招商局平安輪船抵上海住斜橋洋務局表姊丈俞君隸雲表弟毛君艾生及各親友均來接見相敘尤懼旋寄亭叔亦來余請其赴京陪侍吾父並校刻家譜先集叔慨然應允十四日晚登英國公司班哥而船十五晨放洋中途遇霧十八日抵香港港地倚山爲廬分上中下三環遙望之經緯井然不紊爰悟古人量地制邑之法大抵如此益信古人造理字之精蓋細者爲治玉大者爲制里也抵新加坡華僑歡迎者甚衆夾道歡呼具徵吾民愛國之切有馬來隅王亦登舟其妃妾臣官均來送行衣服禮制特殊詳英軹日記中四月朔抵錫蘭島之格崙埠至海濱客館午餐清風徐來與波濤聲相贈答相傳爲文殊降生地其俗佞佛其地產貝葉經余購數頁攜歸自是由印度洋過紅海天氣炎熱不可耐迨抵蘇彝士河氣候驟冷旋達地中海越二日抵法國馬賽略事休息卽行

振謹案本年先生游英法

比美日諸國所經悉詳英軹日記

四月廿二日抵英京英皇派專員偕中國公使張德彝等來接住昔賽而客店呈遞國書

後隨載大臣考察各處學校以愛司福忒爲最距英京約二百里分校共有數十處名儒名相都出其中洵大雅閎達之藪也地近達迷斯支河河中維舟數十舟中書籍報紙咸具爲生徒課餘泛舟消遣之地人游其間消去俗塵萬斛矣旋又游英京大藏書樓樓中書架積長三十二英里度藏各國今古圖籍三百餘萬種東方書籍分中日兩大部中國典墳雖不盡備然亦十得七八殿本圖書集成西清古鑑皆有之法國繙譯微席葉陪余偕往謂中國素號文明今先生來游是邦見歐洲識字人多乎抑中國識字人多乎言次甚露驕色余應之曰歐洲識字人固多然中國識字人貴在躬行實踐譬如仁義禮智必有此四者方可謂識仁義禮智四字奸邪惡逆必絕此四者方可謂識奸邪惡逆四字我中國此等識字人固少諒歐洲亦不多耳微有慚色載大臣以爲知言時英皇患腸癰經剖治始漸愈剖治之夕英民至宮門問候者數千人聞君主略痊相率騶呼巡捕亟告以君主須靜養毋譁一語之後衆聲寂然西國人心固結如此

五月廿五日由英京起程赴比謁見比王年已七十矣步行答拜見余尤極懇勸導觀其起居書室共樓五大楹圖書滿架問余中國學術研求精細君主而不脫書生氣亦罕觀

矣在比勾留旬餘臨行比王贈載大臣寶星並贈余四等寶星六月初八日赴法京旋考其議院制度又游拿破崙廟廟仿羅馬教堂式極闕敞又游也魯鐵塔塔占地數畝下廣上銳高三百邁當合中尺九十四丈俯視齊烟九點衢路如卦蓋極歐洲最高處矣又游巴黎舊城之大樹林法語譯音謂之波哇廣可得二十里叢陰罨藹清流映帶小艇數十藏樹陰中微聞人語小橋有客獨坐垂釣絕似江南風景中設茶座几櫬皆文綠異方之樂啁嘶並奏心曠神怡幾忘人間世也閱數日聞法國因新易政府更定學堂規制不准男女教士充當教習並將教士遣歸鄉里有不願歸者則令轉徙他國吁法人以宗教立國然近時重學輕教如此良足法矣在法瀕行時法總統贈載大臣寶星並贈余四等寶星六月二十七日由法京巴黎起行抵沙灘屯海口二十九日登英公司山博而輪船渡大西洋七月初六日抵美國紐約海口住華得夫客店紐約街道寬闊房屋崇宏壯麗高至四十層余始謂其國之富饒在於善賈而不知其農事爲地球之冠乃天產之利也時美總統在艾士打灣避暑載大臣往謁屬余輩在紐約小住旋乘火車赴溫哥華海口中途樹林蔭翳農人黃冠野服偶有紅種人雜處其中遇早餐時停車略一游覽野草鮮花

別饒風景車行六日始抵溫哥華該埠爲通商要地客寓雖不若紐約之華美亦極閑敞十五日登英公司日本皇后船過維多利亞埠舟行太平洋計半月至二十九日抵日本橫濱旋抵東京住上野行宮地名精養軒越日隨載大臣覲見日本明治皇帝威儀整肅語言不多而均中窾要洵英主也桐城吳摯甫先生名汝綸考察學務適在日本不期而遇至爲歡洽屢次相約夜談論古文源流並曾文正行誼宗旨甚晰時適有查辦學生事吳先生力主和平余因白載大臣辦摺覆奏頗得體要重游日光山臨行時日皇贈載大臣寶星並贈余四等寶星八月十八日由日啓行余請假返蘇掃墓與楊君朗軒同舟赴滬頗不寂寞

振謹案先生有桐城吳摯甫先生文評手蹟跋詳載吳先生論文之語已編入茹經堂文集三編尙未刊其略云先生曰讀文之法不求之於心而求之於氣不聽之以氣而聽之以神大抵盤空處如雷霆之旋太虛頓挫處如鐘磬之揚餘韻精神團結處則高以侈敘事繁密處則抑以斂而其要者純如繹如其音翱翔於虛無之表則言外意無不傳樂記師乙所謂上如抗下如墜曲如折止如槁木纍纍乎端如貫珠皆其精理也知此則通乎神矣又爲余言文者天地之精華牢籠萬有靡所不該貴在獨立不當

偏滯一隅君文理學氣太重夫以理爲學固美矣善矣若以理學爲文動雜以陰陽理氣之說則易入於庸庸而無變化其弊與考據家之支離詞章家之浮靡異體而同譏宜洗滌之余大心折如是者縱談三夜不倦朋僚竊聽莫敢贊一辭

八月杪回太倉蓋十年未歸矣王師自丁憂服闋後未出山謹往謁見並獻六十壽序一篇蓋去年在京抽暇所作親自繕寫者也越日赴劉河掃墓瞻拜松楸不勝依戀順道赴新塘市謁郁氏岳父墓旋回城至西門外吳塘橋謁外祖父墓時五房姪甫叔去世甫逾年嫡母茹苦守節忽聞蜚語忿甚悲慘之餘自縊殉節余大驚嘆出資經理其喪草具事實請 旌逾年作碑文以記之 振謹案先生所作二叔母徐孀人墓誌銘載茹經堂文集卷五第二十三頁

九月初抵京八萬里回家雙親無恙七叔父亦在京相見懽樂時宗譜及五世祖吟秋公遺稿高祖墨池公雜著均已刻成欣慰之至余仍回外務部供職載大臣因赴美勞績奏保文治以知府記名 簡放余公務之暇爲載大臣編英軹日記成進呈 御覽 振謹案先生代清固山貝子載振編英軹日記共十二卷歐美風教沿途景物詳載靡遺擇

善諷行尤具深意光緒二十九年二月由上海文明書局印行近已少傳本其序文並載茹經堂文集卷四第四十四頁

十二月山東泰安府知府出缺時轄境適有教案聞慶邸將以文治奏請簡放定興鹿芝軒相國名傳霖以他部中尙有資格較深者阻之乃止未始非余之幸也

癸卯三十九歲

正月庶務司主稿沈子培先生簡放知府余繼其任每八日須進大內一次見各堂官呈遞奏牘要電等雖極勞苦然閱歷公事獲益甚多

四月引見補和會司員外郎

輯錄許公竹簣出使奏疏函稿成公被難後拳匪劫掠其家書籍著作被毀一空余自去年回國後卽出資屬外部供事員檢覓舊檔將許公奏疏函牘悉行鈔出詳加選擇得奏疏二卷函稿十二卷付諸鉛印以傳非特報知己之遇亦以闡潛德之幽光也

振謹

案先生有許文肅公遺集跋載茹經堂文集二編卷五第五十七頁

刻庚星遺稿玉峯遺稿成庚星爲余總角交玉峯爲余最初弟子鴻爪雪泥聊誌紀念時

南中姚柳屏諸君議刻邵君心炯艾廬遺稿余亦助資刊成之 振謹案先生有陸庚

星遺稿序載茹經堂文集二編卷五第二十四頁又有于玉峯遺稿序載同卷第二十六頁

五月考試差題爲國有六職論學堂以儲才致用應如何預防流弊策

六月引 見補庶務司郎中旋應試經濟特科先是 兩宮因時事艱難 詔開經濟特

科廣求人才同鄉陸伯葵師奏保十二人余與丹揆兄均與焉至是考試首二場均試時務策二道首場余名列二等二場未錄取伯葵師深以爲惜蓋其時余目疾已深未能工小楷也

七月代載大臣議覆候補三品京堂張振勳條陳商務摺張係華僑粵籍富商報效鉅款奉 旨以三品京堂候補張乃條陳商務利弊奉 旨令載大臣議覆余爲擬稿逐條奏

覆計共十二事約二萬言奉 旨俞允

原文存
奏稿內

八月設立商部 簡載大臣爲尙書伍君秩庸名廷芳爲左侍郎陳君玉蒼名璧爲右侍郎 振謹案此疏載茹經堂奏議卷二第一頁略謂竊維近世之言理財者莫不以振

興商務爲急而不知商之本在工工之本又在於農何者蓋商必有其爲商之品物無工則無以爲商也工必有其爲工之質料無農則無以爲工也故欲求商務之興盛在先求工業之精進欲求工業之精進在先求農事之振新云云

八月中旬奉 旨簡徐世昌爲商部左丞文治爲右丞紹英爲左參議王清穆爲右參議方載大臣任尙書後招余至府第密告慶邸將保余爲商部右丞余以驟躋顯位大非所宜外交學已研究數年不願離外部且商務向未熟諳極力堅辭尙書告余慶邸以余不願就意滋不悅云云余不得已以此事宜恩出自 上仍望邸堂斟酌越日 旨遂下召對一次遂假順天府左近房屋作爲商部公所一面在西城粉子胡同覓購房屋改建衙署諸務草創忙碌殊甚

九月擬定商部章程摺分設四司一曰保惠司專司商務局所學堂招商一切保護事宜一曰平均司專司開墾農務蠶桑山利水利樹藝畜牧一切生殖之事一曰通藝司專司工藝機器製造鐵路街道行輪設電開採礦務聘請礦務師招工諸事一曰會計司專司稅務銀行貨幣各業賽會禁令會審詞訟考取律師校正權度量衡等事宜此外設司務

廳專司收發文件繕譯電報所有官制悉照外務部定額同時又擬定聲明商部辦事權限摺奏上均奉 旨俞允 原文存 當即考取司員四十八名載尙書派定掌印主稿內以熙君雋甫名彥祝君芷生名孝復毛君艾生名祖模胡君劭介名祥鏘陶君杏南單君東笙名鎮王君幹臣名大貞阮君子衡名惟和爲最得力輿論以爲商部人才極一時之選焉 振謹案此疏載茹經堂奏疏卷二第二十五頁

是月宣布商政宗旨以保護商民開通商智厚結商力體恤商艱培植商家元氣減輕擔負不苛擾不干涉爲主要堂司各官均宜束身自愛不得自營商業藉圖私利然司官中尙有苞苴求差者有某藩司之子來饋貳百金並持某尙書函求得幫主稿余怒甚立即擲還遂宣言尙有納賄求差者當予嚴參其風始息

十一月徐君菊人改派練兵大臣奉 旨簡文治爲商部左承紹王二君以次升轉楊君杏城名士琦爲右參議維時楊君兼任招商電報兩局總辦留滬辦事 振謹案茹經堂奏疏卷二第三十四頁有聲明商部辦事權限摺爲癸卯十一月所上

甲辰四十歲

我國商情渙散余意非盡力提倡斷難振興爰擬定訂立商勳摺計分五等優獎以勵實業並擬請設農工路鑛各項公司片奏上均奉旨俞允原文存奏稿內載尙書奏保張君季直名塞爲商部一等顧問官 振謹案訂立商勳摺載茹經堂奏疏卷二第三十八頁請

設農工路鑛各項公司片載同卷第四十頁

陳君玉蒼前在順天府尹任內曾開辦京師工藝局在順治門外四眼井分紡織磁器玻璃木工等科雖不完備而收養貧民用意極善至是改歸商部管理

二月奉旨調伍君秩庸爲外務部左侍郎顧君康民爲商部右侍郎顧到任後舊雨相逢歡洽之至

六月中在頤和園召對一次 皇太后垂詢商務甚詳並諭汝能廉潔辦事亦很好此後 召見迭蒙 溫獎清廉聞之悚惕

議設高等商業學堂於西城祖家街租屋開辦奏請以紹君越千爲監督陳君石麟爲教務長考取學生王兼善姚履亨等一百餘名族弟靜之名文壽亦與焉學生寶山張公權名嘉璈金侯臣名其堡松江項激雲名鎮方阮介藩名尙介等均來受業

七月哭翁叔平師師自戊戌被貶回籍後杜門不出辛丑年通音問一次余入商部後聞師對人言每以余不諳商務爲慮本年五月遽以疾卒噩耗傳來痛心何極謹輓一聯云公之平生司馬君實我有知己歐陽文忠嗣後作記文一篇敍公被謫之由俾後之君子知所考焉 振謹案先生所作記翁文恭公事載茹經堂文集卷六第五頁

冬奏派參議王君丹揆赴江浙等省考察商務

議設總商會於北京上海兩處再就漢口等處次第推廣余草擬奏稿並簡章二十六條大要在通商情保商利有聯絡而無傾軋有信義而無詐虞而其辦法重在剔除內弊考察外情庶幾商政得以逐漸進步載尙書深爲贊成奏上 召見文治垂詢 皇太后意極游移文治對以商人均有資本決無流弊 太后始釋然遂邀 俞允通行北京首設商會載尙書屬余蒞會演說從此商人乃知互相團結矣商務爲國家命脈提倡之責惟此稍盡心焉爾 振謹案請設立商會摺載茹經堂奏疏卷二第三十五頁

乙巳四十一歲

正月粵商張弼士入都請辦三水佛山鐵路並在山東開辦葡萄酒公司余爲具奏邀

准張瀕行饋余貳千金余辭之至於再三張滋不悅則嚴卻之其後粵商張煜南請辦潮汕鐵路閩商林爾嘉請辦福州銀行均饋鉅金一律峻拒

三月滬商夏瑞芳呈請設立商務印書館又虞輝祖呈請設立上海科學儀器館均批准立案旋接瑞安黃仲弢學士名紹箕書謂外人現籌集鉅貲擬到中國廣售圖書儀器等虞商資本有限勢不能敵請在輪電兩局撥官股接濟云云爰咨商管理輪電大臣袁世凱咨覆未能照准深爲可惜 振謹案黃仲弢學士與先生原函見鮮庵遺文之一

六月左侍郎陳君玉蒼調署戶部侍郎奉 旨以文治署理商部左侍郎

七月議設立勘礦總公司以保主權奏上奉 旨俞允原文存
奏稿內 振謹案此摺載茹經

堂奏疏卷三第三頁又同卷六頁有請籌撥勘礦總公司官股片亦乙巳七月所上

編訂商律成

維時官制緣敗事權不一動多牽制爰擬改定官制摺奏上留中 振謹案此摺載茹

經堂奏疏卷三第二十三頁

八月初奉 旨派載澤端方戴鴻慈尙其亨紹英五大臣赴各國考察憲政啓行之日余

偕商部同人赴正陽門外車站送行五大臣甫登車余等正在車外接談忽轟然一聲車中炸彈爆裂幸余所立處距車一丈許並未受傷當即至車站客廳內飭人詳細查問始知有革命黨某後詢知爲安徽吳姓施放炸彈其人已死車中紹大臣受傷頗重隨員中有薩君霽謙名蔭圖受彈子傷數處載大臣之侍衛炸去一臂幸未死均送中醫院送行者伍君秩庸在車旁震倒於地兩耳皆聾亦入醫院載大臣等暫歸越數日始行

時因風氣日開外侮日亟窮變通久不得不爲先事之謀爰擬請立憲摺奏上留中

振謹案此摺載茹經堂奏疏卷三第二十頁

十月派司員吳振麟魏震等數人赴東三省考察各種實業余意通商實邊當自東三省迤西至內外蒙古以達青海西藏以汽車鑛業兩公司爲根本以他種商業爲後盾如此則北京一區如背之有椅可以高枕無憂先派員調查再籌辦法不意阻撓者衆迄未能實行爰草具興辦東三省要政奏稿呈總憲陸伯葵師則大韙之爲代上格於部議其事遂寢可痛也

振謹案先生所擬興辦東三省要政奏稿載陸文慎公奏議中題爲請飭東三省速舉要政摺共列十項一經營營口二疏治遼河三探掘撫順炭礦四監理東

清鐵道五贖還安奉鐵道及新奉鐵道六設置大連海關七預備十八處通商口岸八勸視間島九平靖鬻匪十收回遼東法權均分晰利害臚舉辦法末謂俾東三省不致爲朝鮮埃及之續可謂痛哭流涕而道之今竟不幸而言中先生徒獲先見之明無怪乎先生每談東北之事未嘗不太息痛恨不置也

奏請以丁君衡甫名寶銓周君舜卿名廷弼爲商部顧問官丁君已丑進士山陽人品行峻邁開通明敏長於政治學至是與余相見如舊相識遂通譜焉嘗喟然謂余曰時局至此恐難整理吾輩各盡心力而已並痛惡某當道以爲必不能免於禍後官至山西巡撫國變後隱居滬上無端被刺而死余未悉其事實故未爲之作傳思之每慙然也周君係鐵業鉅商無錫人

奏請於正陽門外設立勸工場始事構造

奏請將西直門外三貝子廢園改設農事試驗場余初意本擬購置外國農產各種子如美國棉子印度茶苗之類逐一試驗令各省農人改良種植乃自余離部後當事者忽將試驗場改作萬生園可嘆也

是年 皇太后壽辰賞大壽字一副玉如意一柄自署侍郎後每遇令節必蒙 恩賞如綢緞普洱茶春條等文治每感極而嘆曰 恩禮如此使臣工僕僕亟拜曷若信用臣言改良政治之爲愈乎

丙午四十二歲

正月四子慶永生字曰師萊號曰季長 振謹案先生有四兒孝長字說自記云此文

成後家大人因孝字已定爲後代名特命改爲季長仍存此文作爲家訓云載茹經堂文集二編卷三第七頁

舉行京察大典奉 旨以文治補授商部左侍郎 召對一次

三月奏請設立商業模範銀行奉 旨交戶部核議遂爲所沮未行 原文存 奏稿內 振謹案

此摺載茹經堂奏疏卷三第一頁又同卷八頁有請調用人員設立儲才館摺十五頁有請遣派學生出洋片俱丙午閏四月所上

六月議復北洋大臣政務處奏路務議員辦事章程不無窒礙摺 原文存 奏稿內 初商部奏設各

省路務議員章程頒行各省不獨佐商部耳目所未周亦所以助各省疆吏之督察乃北

洋大臣袁世凱以爲不便於己極力反對奏請飭商部將章程刪改余因復奏申明埋山同僚以爲不宜開罪於袁余謂事上治下當明大體非與袁爭權也摺上留中 振謹案此摺載茹經堂奏議卷三第三十六頁陳石遺先生撰先生全書總敘所謂其與直督袁氏爭議路務摺侃侃不撓允爲必傳之作者也又同卷第十六頁有請設各省農工商務監督以興要政摺亦丙午六月所上

王丹揆兄患胃病甚劇余爲照料一切至六月中忽奉 旨簡放直隸按察司蓋有人忌商部辦事精勤欲去載尙書之左右手也丹兄遂假歸不赴任

九月載尙書奉 命偕徐菊人赴東三省查辦事件奉 旨改商部爲農工商部 簡文治署理尙書自維責任愈重報稱愈難具摺謝 恩後 召對二次 皇太后益加勉勵云 振謹案此摺載茹經堂奏疏卷三第三十五頁

送載尙書赴東三省臨別依依尙書屬將東三省來往要電由余轉飭司員王大貞譯送邸第以期慎密

勸工陳列所落成外省送來土產人工物品極多載尙書前派司員陸君芝田名大坊祝

君紫升名瀛元管理當於十月朔日行開幕禮 奏明後 召對一次

奉 旨將工部歸併農工商部接收案卷一切甚爲忙碌所有工部舊員均須設法位置
幸前任工部尙書陸鳳石先生名潤庠遇事詳晰指示有令尹子文之風余因得辦妥無
誤 奏明後 召對一次 振謹案先生有紀陸文端公事載茹經堂文集卷六第十

二頁

十一月初一日吾母病作蓋初時患半身不遂之證臥牀已十年矣至是患全身作痛後
患痰湧氣喘福建力君軒舉名鈞御醫也隨載尙書赴東省急電請回京診治渠云無妨
乃服藥後並不見效

十二月初載尙書回京余遂不復到署壹意侍奉湯藥初十日後病愈劇不能言語至
十一日辰刻吾母竟棄不孝而長逝矣嗚呼痛哉照料殮殮一切皆賴同鄉陸君勤之名
起及李生頌韓之力載尙書來弔執余手隕涕云余不啻斷一臂矣諸王公及各部大臣
中如肅邸澤公喀喇沁王那公琴軒鹿公芝軒孫公燮臣陸公鳳石皆親來弔唁焉

振謹案先生有先妣胡太夫人事略載茹經堂文集卷五第十一頁

丁未四十三歲

正月先妣出殯於長椿寺租屋三間頗敞同部諸君咸設路祭痛心曷已

二月杪由京扶柩起程王仲虎譜弟名曾武送至天津許弼丞姊丈送回太倉情誼均極可感抵津後乘新裕輪船一路平順抵滬時寄亭七叔父樸丞弟俞慧雲表姊丈及各親友等均在碼頭迎接頗大姑母及大表姊等上船來弔皆痛哭失聲旋雇小船拖帶至太倉入城住隆福寺設奠卽扶柩至劉河二十都二圖揚子涇先塋安葬於再昭穴送葬者七叔父等二十餘人襄葬者吳健侯母舅許君叔明也計石灰一百擔用一成沙二成土七成灰拌勻鋪三寸爲一作土工人用木鎚輕打之三寸打成一寸則一作工竣矣俗謂之白雲葬余廬墓數日監視工人事畢後痛哭別墓僭弼丞姊丈回京四月抵京幸吾父康健行虞祭禮

五月載尙書爲人參劾怏怏辭職奉旨以溥仲魯尙書名題代之亦宗室也論者謂農工商部一蹶不振矣

是時立憲並未實行大局岌岌可危南皮張香濤制軍名之洞項城袁慰庭制軍名世凱

皆入贊軍機余嘆曰國力盡矣著蓄艾篇二卷上之慶邸聞者皆莫之省
振謹案先生此書未刊

七月編曾子大義先成二卷第一卷爲孝經第二卷爲論孟中曾子語此外擬編大戴禮記中曾子十篇小戴禮記中曾子問大學二篇及經子中曾子語以完曾子二十篇之舊
振謹案第一卷孝經大義已刊入茹經堂全書中博采旁稽詳演申論剴切透達令人讀之孝悌忠順之心油然而生蓋先生用意所在非徒疏釋文字而已第二卷尙未刊餘未完成禮記大義大學大義則別爲專書

溥仲魯尙書親來請余爲北京實業學校監督堅辭之鐵寶臣尙書名良欲請余爲北京貴冑學校監督亦婉辭之

七月譜見世伯先之喪歸自安慶伯先與余患難之交一磨出守洊升安徽藩司乃因患痢病遂不起余往弔之不禁哭失聲焉

八月郵傳部陳玉荅尙書奏請派余爲上海實業學校監督

原名南溥

因念吾父年高思鄉

綦切因允就職陸伯葵師爲吾父餞行情意惓惓九月初旬奉吾父南歸遂行者桂月亭

尙書名春及汪君伯唐胡君劭介諸人到滬後暫住俞隸雲表姊丈家旋赴徐家匯實業學堂就監督職時教務長爲馮君玉蕃名琦齋務長爲梁君鉅屏名業庶務長爲周君子衡名銓附屬小學主任爲林君康侯名祖潛學生約三百人小學生約百人因前任監督久不到校頗形廢弛爰力加整頓並請寄亭七叔父襄助庶務李生頌韓爲國文教務主任旋電請農工商部派學生楊錦生等六名赴美國學習商科

戊申四十四歲

正月回劉河省墓前始立旗杆二七叔父及表兄朱君誦六名之經代爲經理松楸無恙可感也

實業學校舊設普通工程科特爲改設鐵路專科教務長馮君玉蕃庶務長周君子衡辭職請梁君鉅屏爲教務長嘉定夏君蕉飲名曰棗爲庶務長又於星期日設國文補習課余親自上課教授

是年浙路風潮甚急先是商部奏請建設滬杭甬鐵路派王君丹揆爲監督山陰湯君蟄仙名壽潛爲經理蟄仙余壬辰同年也至是英公使言於外務部謂滬杭甬路與滬甯路

並線按照滬甯合同應歸英人承造不得由中國人自造浙人大憤贊仙爭之尤力余爲之疏通幸慶邸堅持仍由中國商人集股自辦以保主權

八月江蘇教育總會舉余爲會長會設上海西門外林蔭路會中同人如楊君翼之名廷棟雷君繼輿名奮沈君信卿名恩孚吳君畹九名馨皆極一時之選

十月中旬忽聞 皇太后 皇上升遐之耗感念 恩遇曷勝痛悼而 皇上薨逝在

皇太后仙馭前二日尤可疑也謹赴上海道署哭臨三日旋廷臣議尊號 皇太后爲孝

欽顯皇后 皇上爲德宗景皇帝 皇太后遺詔命 醇親王載灃爲攝政王 大行皇

帝無嗣立醇親王之子兼祧 穆宗毅皇帝爲嗣嗚呼國家之變至此而極矣聞 皇太

后真冷時初命慶邸攝政慶邸力辭此蓋氣運使然非人之所能爲也

是年冬請陸君規亮名瑞清爲實業學校齋務長

己酉四十五歲

是年改元宣統元年

二月二十一日釋服白駒過隙痛心無已作大孝終身慕父母論三篇附孝經大義後

振謹案先生所作孟子大孝終身慕父母論三篇並載茹經堂文集卷一第三十九頁
三月隨吾父回劉河省墓

總憲陸伯葵師謚文愼公之喪歸自京師公因世變多故鬱鬱不得志去年八月竟以疾卒其平生氣節凜然有古大臣風愛才極篤待余尤厚臨別餞行時忽語吾父曰吾恐不能見君矣旋握余手諄諄以身後之名相屬方共訝其不祥而不意其竟爲先兆也其長公子芝田扶柩歸余往迎於輪舟中撫棺大慟焉

夏設立電機專科請美國人謝而屯爲科長中國學校之有電機自此始並定每年選派路電兩科畢業生入美國大學肄業

秋蘇撫某公因省庫支絀倡征銀解銀之議余因民間並無現銀折合火耗吏胥上下其手剝蝕小民爲害滋大電達政府力爭之得罷

太屬諸同鄉舉余爲太倉中學監督余因未能常駐校中請同鄉朱君叔子名文熊爲主任學生約二百人余並在太倉設立藝徒學校分木工織工兩科友人蔣君仲經擔任經

費不足余捐資補助之

後數年蔣君設
改爲工藝廠

十月間三兒慶增患傷寒病甚劇屢瀕於危延陳君蓮舫診治陳爲松江名醫住朱家閣冬編國文大義成先是余上課苦無國文教授善本爰隨講隨編普論大義分才性理氣等凡二十餘門書成分二卷

振謹案先生此書已刊入茹經堂全書中

庚申四十六歲

正月三兒腦背復生外症時虛弱已極頭足均不能動本校職員葉君晴峯薦滬醫夏君蔭堂名紹庭診治竟獲全愈闔家相慶以爲死中得生云

三月初四日爲吾父七十壽辰命弗稱觴而送禮者絡繹吾父心甚厭之命余攜帶大兒慶詒並請西席徐君蘭孫名福塘於初二日早偕赴西湖住昭慶寺遊靈隱諸名勝塵襟一滌天倫之樂無窮也初十日返滬

蘇提學使樊介軒先生名恭煦偕譜弟曹君叔彥來滬請余爲蘇州存古學校史學教習余因史學非所長辭之先生與叔彥堅請不肯去不得已允其寄卷評閱旋赴存古學校講學一日勛諸生

軍機大臣袁世凱獲譴奉旨開缺回籍

夏在實業學校對門購定房屋設立商船駕駛科請英國畢業生夏君應庚名孫鵬爲科長

江蘇士紳舉余爲地方自治總理以蔣太史季和名炳章朱太史錫百名壽朋爲副余因地方自治無領袖頗爲危險爰往就職自治籌辦處設在蘇州五百名賢祠對門蓮池環繞地極幽雅駐辦爲觀察夏劍丞名敬觀太守陸勉齋名懋勳各縣參議賢俊之士甚多余卽借寓名賢寺中往見蘇撫瑞君莘儒名激又見臬司左君子宜名孝同文襄師之少子也談甚款洽是後余每月赴蘇一次

上海圖書公司印曾文正公手書日記浼林君康侯來乞余爲序余恨未及文正之門常服膺而私淑焉爰本斯意作序一首目疾甚勉強親書之
振謹案先生所作曾文正公日記序載茹經堂文集卷四第三十頁

王紫翔師之太師母張太夫人賢而多才著有三省樓詩稿余謹序而印行之王師心甚慰
振謹案先生有三省樓賸囊跋載茹經堂文集二編卷五第五十三頁

陸文愼師在御史臺時嚴參權貴又劾太監李蓮英直聲甚著余囑陸世兄芝田寄奏稿

來殘缺不全爲之潛然釐訂二卷謹序而印行之

振謹案先生所作陸文愼公奏議

序載茹經堂文集二編卷五第二十一頁

是年冬辭太倉中學監督請辜君湯生名鴻銘爲實業學堂教務長陸君勤之爲實業學堂庶務長

軍機大臣南皮張公香濤卒於位張爲一代名臣聞之感嘆其絕命詩云南人不相宋家傳自詡陳橋識杜鵑辛苦李虞文陸輩終隨落日墮虞淵可異也

辛亥四十七歲

正月接郵傳部電囑在吳淞礮臺灣建商船學校余親往相度地勢命工師繪圖剋日興工請陸君勤之監造八月竣工

四月汪君伯唐來滬汪時爲駐日本公使見外侮日亟國勢岌危特回國招余與張君菊生在張宅密議救國之策議定請醇邸奉 皇上赴英美求學請慶邸當國多招賢士大夫爲之輔佐或可挽國運於萬一公推伯唐赴京條陳其事乃伯唐抵京後醇邸僅召見一次伯唐痛切敷陳醇邸曰現有海陸軍何有外侮伯唐曰中國海陸軍其可恃乎醇邸

遽曰汝去伯唐出語同朝皆莫之信甚有以爲無病之呻吟者伯唐廢然赴日本乃知國事萬不可爲矣

夏招考商船學校新生報考者三千人擁擠不堪計專科及中學共取一百八十名常熟翁君寅臣之世兄某程度較低余勉欲錄取之夏應庚以爲不可因擯去心甚歉然旋請莊君思緘名蘊寬爲商船學校庶務長

八月國變事起初川漢鐵路國民欲收回自辦政府欲借款開辦令有違抗者格殺勿論蓋用盛宣懷之策也於是人心大去適兩湖總督瑞澂窮治革命黨軍人遂擁載黎元洪起事瑞澂逃亡各省響應獨立遂議改共和政體不及二月已徧全國滿人良弼鳳山皆爲黨人炸彈所斃其勢岌岌不可終日莊君思緘來出示伍廷芳等電稿請求 皇上遜位邀余列名余歎曰人才不用國運盡矣欲保全 皇室不得不出於此遂附名焉後王師深咎余以爲不應列名沈子封師亦深以爲非見於辭色後數月俄國革命俄王尼可來不從爲國人鎗斃孤臣耿耿之心當可白於天下後世矣

九月在無錫西溪建築新屋落成其地本爲周君舜卿所有余以三千金購得之三月間

動工並建家祠一幢於屋之東北至是工竣吾父因亂事方殷仍居上海

冬編古人論文大義成自韓退之始至吳摯甫止凡三十家共分二卷助余搜輯者李生頌韓之力爲多 振謹案先生此書已刊入茹經堂全書中

壬子四十八歲

正月十二日吾父徙居無錫新屋余隨侍至錫旋回上海暫離膝下不勝依依是後遂時往來申錫間悔不建屋在上海也

商船學校學生公奉薩君鼎銘名鎮冰爲校長薩本爲海軍提督長於駕駛余卽往迎以學款房產等悉交與之

去年國變暫改實業學堂爲南洋大學春間秩序稍定而校費無着余因偕陸君勤之赴

京晤交通部

時改郵傳部
爲交通部

總長施君植之名肇基面商施因無款可撥囑動用本校存款

並改名爲上海交通部工業專門學校云在京住許弼丞姊丈家謁陸鳳石相國時爲

內廷師傅殷殷話舊相對歛歛爲余寫唐氏宗祠行素堂匾額各一是時慶邸在天津未及往謁晤紹越千丈及農工商部舊同僚均依戀不舍京師氣象腐敗已極余小住數日

卽回上海

四月辦太倉等處水災賑務余自京回南卽赴太倉省墓某日在舟中黎明未起夢中忽聞岸上人語曰某家賣婦得二十四元可憐某夫僅得十二元耳余驚醒命停舟覓其人已不可得舟子常熟人也余問曰常熟去年荒象何如舟子曰噫近時鄉人家多食豆皮有一家三人餓垂斃鄰人爲之借米煑粥粥成而三人氣均絕矣余聞之墮淚回滬商諸李君平書名鍾珪捐米一千石又募捐洋一千元卽分散太倉常熟崑山無錫四處太倉請王君熾甫名乃昌主其事王君辦賑極爲切實

夏請胡君振廷名棟朝爲教務長胡爲美國康奈爾大學鐵路科博士相見後欲從余治國文因執弟子禮亦難得之士也

著人格成余初欲作校訓後因胸中所欲言者甚多爰著此書定子弟學生師友等凡五

格爲一卷

後數年又增軍人格

振謹案先生人格一書示人以立身處世之標準上探周秦以

來聖賢諸子下逮宋元明諸儒之論說加以淺顯疏解允宜家絃戶誦手置一編也已刊

入茹經堂全書中

冬編國文陰陽剛柔大義成本曾文正古文四象發揮其義又別選古人文以廣大之頗爲詳盡 振謹案陰陽剛柔之說昉於姚姬傳氏曾文正繼其說而大昌之先生則綜二家之說論之而更進焉曰凡人之情性氣質毗於陽者陰亦寓焉毗於陰者陽亦寓焉天地之道陰陽之氣常相勝而相爭惟明於消息之故於其偏而調劑之且因其偏而善用之善驗古人文之神與氣亦若是而已所編國文陰陽剛柔大義八卷選周易尙書詩經論語孟子國策莊子賈生董生司馬子長揚子雲班孟堅韓退之之文而分注陰陽各名於其下陳石遺先生撰先生全書總敘稱爲論文之至精而無弊者也其緒言並編入茹經堂文集三編尙未刊

癸丑四十九歲

二月家祠始行春祭禮寄亭叔父來助祭築愛蓮坐花二亭成愛蓮爲高祖考墨池公別號吾父手書亭中匾額思祖德也坐花亭吾父所題名桐城吳芝瑛女士爲書匾額時布置苟完矣

夏建造電機試驗廠余先在工業學校上院北設立機器廠規模甚隘其後略加擴充至

是購買電機價約數千元別設電機廠請科長謝而屯主其事

以後逐年增購
機器規模略具

冬編論語大義成採用朱注別下己意爲小注取簡單以便初學又探先聖精意作大義

二十篇

此後刪改數
次乃成定本

振謹案先生此書已刊入茹經堂全書中其鄉黨微子子張三

篇大義並載茹經堂文集卷一第十七頁

十一月適顧氏大姑母去世姑丈顧叔英先生先卒姑母無子依表姊丈俞君隸雲以居

沒後吾父哭之慟殯葬一切皆隸雲兄伉儷料理余送殯至太倉

甲寅五十歲

春爲諸生講易採用程傳並項平甫先生周易玩辭 御纂周易折中及近代易師說擬

編周易大義先作易微言三篇寄曹叔彥譜弟指正叔彥亦寄余易箋稿本互相質證

振謹案先生前後所作易微言俱已編入周易消息大義中

五月大表姊俞母顧夫人去世余中表兄弟姊妹共七人而俞夫人最長賢而多才能詩

文幼時最爲先妣所愛賞乃因外症遽不起幸三月間表甥鳳賓名慶恩已從美國遊學

歸其幼女慶棠卽余聘媳也哀毀特甚余爲文以祭之 振謹案先生所作祭表姊俞

室顧夫人文載茹經堂文集二編卷九第三頁

六月七日女慶婉生

八月送大兒慶詒赴美國比洛歐大學肄業科長謝而屯所介紹也時慶詒年甫十七甚幼樾吾父意頗悵快幸時得安稟以爲慰

冬編孟子大義梁惠王公孫丑滕文公三篇成仿論語大義體例採用朱注兼採張南軒先生孟子說余別爲傳義以穀梁釋經法行之頗有古致每篇後各附大義一篇 振

謹案先生此書貫串羣言發揮新義於孝弟人倫之本出處取與之經察識擴充之幾關邪反正之道不憚剴切敷陳而其尤注意者則在剖析義理警覺良知又以孟子之文筆陣縱橫兼采眉山蘇氏桐城方氏評語著於篇於孟子道德文章之指歸可謂兼備矣已刊入茹經堂全書中其滕文公篇大義並載茹經堂文集卷一第三十一頁

乙卯五十一歲

春仍爲諸生講易上經畢閱姚配中先生周易姚氏學深得先聖憂患之旨又安徽陳世鏞周易廓一書漢宋兼採亦頗精善季生頌韓又得書賈送來周易集解鈔本一巨冊其

評語原本漢易家法極爲精辨惜其下冊已爲他人定購書賈旋來取去余僅臨得上經交臂失之可惜也

五月澄錫戰事起江陰礮臺兵變也先期余聞警馳歸無錫迎吾父赴滬吾父因料理物件命內子先行不意火車已阻晚間鎗礮聲隆隆至夜半始止知江陰兵敗退矣越一日始隨侍吾父到滬已受虛驚矣

冬編孟子大義離婁萬章告子盡心四篇成並作自序頗中時弊有能讀此書者或可救世道於萬一也 振謹案先生所作孟子離婁篇大義除已連同他篇刊入孟子大義專書外並載茹經堂文集卷一第三十四頁

丙辰五十二歲

春請阮君子衡名惟和爲上校庶務長並請徐生守五名經郭爲英文科長徐卽本校學生余派赴美國游學者也

六月辦理長沙賑務湘省督軍張敬堯與黨人戰縱兵淫掠地方糜爛所擄掠之女子賣價每名四五元有北軍擄一婦不從兵斬其頭落地時婦方抱小兒乳血濺滿兒頭兒亦

墮地有教士見之大憤抱見張敬堯張曰非吾兵也此外慘酷事多不忍紀余聞之潸然
商諸上海紅十字會會長沈觀察仲禮名敦和並經理江君趨丹名紹墀慨然允撥款又
商諸宗兄郭鄭名浩鎮阮君子衡劉生汝梅名天成魏生旭東名廷暉沈君健生名炳燾
同赴長沙放賑魏沈皆湘人也至十月間方竣計賑款五萬餘元沈會長請余爲紅十字
會名譽會員 振謹案先生有宗兄郭鄭墓誌銘載茹經堂文集二編卷八第四十八
頁

七月添設鐵路管理專科於是專科凡三粗具大學規模矣
冬編大學大義成用鄭注本參以朱注及劉戡山孫夏峯李二曲諸先生說共一卷又可
編入曾子大義中也其敘文頗爲曹叔彥譜弟所推重貽書謂可資誦讀云 振謹案
先生此書已刊入茹經堂全書中其敘文並載茹經堂文集卷一第二十二頁
是年修理濬漕松岩公墓建造蝴蝶牆門並贖回墳旁餘田二畝共費四百餘元

丁巳五十三歲

三月爲吾父重游泮水之期宗兄郭鄭諸君請於政府特贈芹藻重芳匾額校中諸同人

於初四日吾父生辰會飲慶祝憶吾父州試第十三名入學第四名學使孫宗師諱葆元題爲友多聞益矣余當筵背誦吾父入學文起比尙能一字不誤

夏編先儒靜坐集說一卷自李延平先生始至李二曲先生止其中尤以高忠憲公靜坐說爲最精密 振謹案先生此書尙未刊

編近思錄劄記思辨錄劄記各一卷皆二十年前評讀之語輯錄成書 振謹案先生

此書尙未刊

冬編中庸大義成如大學大義例惟鄭注本以君子之道費而隱屬於索隱行怪章又末章分節多舛誤不及朱注特糾正之又作提綱推及於天人本原於誠孝自謂稍有功於世道也 振謹案先生此書已刊入茹經堂全書中其敍文並載茹經堂文集卷一第二十四頁

戊午五十四歲

春籌辦工校圖書館擬建築於本校中院之東南費約八萬元除交通部允撥三萬元外余擬分組募捐

四月表姊丈俞君隸雲去世隸兄與余交最厚爲人忠實至誠崇尚氣節病中風二年病歿後余往弔之見諸甥及甥女哀慟欲絕余不禁痛哭後爲作墓誌銘一篇 振謹案

先生所作俞君隸雲墓誌銘載茹經堂文集二編卷八第四十六頁

五月杪赴太倉哭王紫翔先生自 國變後先生改號溪山老農日以祈死爲事去年九

月余往省視先生身體尙健爲余刪改外舅黃浚之先生家傳余臨行時先生送至門曰汝來吾心甚喜體必較健大約尙可相見也乃四月間病甚余聞信回太則先生已不能

言矣逾二日卽卒追念教誨之恩涕泗滂沱六月初旬復往設奠一次

祭文存
文集

與諸同學

商謚曰文貞 振謹案先生所作祭先師王文貞公文載茹經堂文集卷六第四十頁

六月編許公竹簣外集成初余搜輯許公奏疏函稿印數百部外交部陸總長子輿名徵祥許公之舊屬也見而寶之亦印行數百部並屬余輯外集余因託嘉興門人王君寅清名永禮於許公親戚盛萍芝先生處訪求搜集共成五卷又日記書札各一卷余爲之敍請陸總長印行之 振謹案先生所作許文肅公外集序載茹經堂文集卷四第三十

二頁

編工業學校國文課本成教員李生頌韓黃君虞孫名世祚黃君子楨名宗榦鄒君聞馨名登泰之力也 振謹案先生有中學國文新讀本序載茹經堂文集二編卷五第三

十四頁

冬編十三經提綱易書詩三禮成並續作易微言二篇

刻王文貞師讀左質疑先生著作甚夥其文集年譜已由世兄慧言名保諱刊刻而讀左質疑一書於劉歆所竄入者摘抉精詳余爲刊行之謹作跋於後 振謹案先生有與

王君慧言書載茹經堂文集二編卷四第七頁讀左質疑跋載同編卷五第五十四頁

是年修理澹漕文壁公墓贖回墳旁餘田一畝五分零費與前年略同

己未五十五歲

正月八日赴太倉送王文貞師栗主入陸陳江盛四先生祠蓋先生創設四先生祠堂者也 祔祀其中衆咸曰宜恭送者約百餘人同學宿遷黃方伯伯雨遠道來送相與話舊留三日而別

五月初七日學界攻訐曹汝霖陸宗輿相率罷課惟時余目疾日甚因赴蘇州天賜莊醫

院請醫生張渭漁名卜熊者解剖左目卒無效醫院起居亦多不便小住數日卽返錫悉寄亭七叔父於十一日去世深爲痛悼

五月十七日女慶婉以驚風殤婉兒生六歲尙不能行走平日食乳不足體弱可知然是兒極有情意曇花一現曷勝痛心棺木一切均託宗姪肇農代爲購辦肇農名穀源保謙弟之長子人極誠懇可感之至此後一月余常臥床養日百念俱灰 振謹案先生有

宗姪肇農哀辭載茹經堂文集二編卷九第十六頁

八月聘媳俞慶棠赴美留學偕其兄頌華名慶堯來辭行內子送別爲之黯然余特電達慶詒命其照料時慶詒已轉入紐約哥倫比亞大學矣

冬太倉水災甚巨西鄉河川橋一帶鄉人居屋內水深數尺無所得食余商諸旅滬同鄉會吳君挹峯名鍾秀項君惠卿名堯仁張君綸卿名大誠會同募捐項張二君曰同鄉會無人主持久矣君能來就會長職吾輩必當盡力余欣然就之惠卿遂商之濟生會王君一亭允撥賑款棉衣等旋復各處勸募余請陸君蓬士名修瀛朱君懜儔名增元周君幹如名之楨及沈君健生分赴河川橋毛家市鹿湖蓬萊鎮新豐鄉各處散放而棉衣請官

廳發護照諸多留難遲到一日新豐鄉已凍死老嫗一鹿湖凍死小孩一嗟乎余之罪也古人云放賑如救火不可須臾緩豈不信哉是役共放賑洋約二萬元本邑別有以工代賑款開濬河道由縣知事盧君主其事

編十三經提綱春秋左氏公羊穀梁三傳論語孝經爾雅孟子成合上年所編共分二卷是編之意專爲開示初學讀經門徑後人得此當不至畏難中止矣 振謹案先生此書總羣經之綱領吸百家之菁英發微言明大義陳宗旨辨家法於真僞得失詳細開示誠讀經之津逮也已刊入茹經堂全書及無錫國學專修學校叢書中

庚申五十六歲

正月初四日醫生張卜熊來招赴蘇治右目以針挑之亦無效心甚悔之孟子云莫之致而至者命也余平日多過獲罪於天豈能挽救乎

正月二十日工校圖書館行開幕禮工程頗完固部派劉君同仁名成志來驗收來賓約二千人極一時之盛

三月初四日爲吾父八十生辰時太倉西鄉尙須辦理春賑吾父拒絕賓客命以壽筵之

資移放春賑共得約二千元至散放時因去冬尙有餘款僅用去八百元尙餘一千二百元吾父命以此款存放生息設太倉敬節會周恤窮嫠定額二十四名每名每年津貼洋十元六月十二月兩月杪送給

四月組織無錫中學初余因無錫高等小學學生甚夥畢業後遠赴各處求學頗覺困難擬設立中學懷此願久矣至是門人蔡生虎臣名其標介紹門人高生踐四名陽來言奉其先人秋荃先生之遺命於錫邑設立中學余爲訂定章程具呈省縣暫租西水關馬氏房屋爲校址計開辦費三千元建築房屋費二萬元基本金四萬元踐四堅請余爲名譽校長余因請江太史霄緯名衡爲主任門人周生緝菴名熙爲教務長先招初二年級生兩班四兒慶永亦往肄業焉

振謹案先生有高君秋荃傳載茹經堂文集二編卷六

第二十八頁

夏得慶詒家書就萬國國際聯盟會委員嚴君鶴齡聘爲祕書由美赴瑞士國會地名日內瓦慶詒去年學外交科畢業得碩士學位尙未得博士深爲可惜然藉此遊歷歐洲亦不無裨益耳

八月送三兒慶增赴美國比洛歐大學肄業學經濟科

後改入米希根大學

族姪慶同逃亡慶同父寶生名文浩遠族弟也前數年去世余時照料其家弟婦席氏孀母王氏相繼逝世尙餘田產爲太倉田販朱少山輾轉售賣余一面嚴追朱少山還款一面送慶同入學讀書旋逃出送入太倉工藝廠因病回滬由同鄉顧君福生送至漢口雞蛋廠旋逃回余因託同鄉吳君昆生名增裕介紹入上海福新麵粉廠旋又逃出告其父執汪君春涵云將赴南通春涵止之遂去不知所往除迭次所用川資衣服等費外尙餘洋二百餘元又贖寶山田二十畝不得已暫爲經理田租託太倉金君桐生代收歲約得二十元

後以此項款產交資生近房子涂弟名文錦收管

自八月始吾父飲食不進精神委頓余甚爲惶急後改飲雞湯略進麵包至十月後始漸痊蓋溼阻爲患非本原病也

自上年學潮後學風愈覺不靖余因吾父老病目疾日深已先辭工業專門學校職數次而交通部長迄不允至十月初三日余遂決計解職回錫蓋函電交馳至此凡十次矣部中派員來留本校同人來請留者絡繹於道均堅拒之自問精力日衰私衷歉仄而已

十二月錢唐施君省之名肇曾託友人陸君勤之介紹屬余在無錫開辦國學專修館定開辦費八千元常年經費每年一萬元余思講學家居平生之志爰訂定學規章程託蔡生虎臣借租錫商山貨公所樓房兩幢爲教室宿舍地在錫山之麓卽於無錫上海南京三處招考報名者近千人取定師範生正額二十四名附額六名爰宣布講學宗旨略謂吾國情勢日益危殆百姓困苦已極此時爲學必當以正人心救民命爲惟一主旨務望諸生勉爲聖賢豪傑其次亦當爲鄉黨自好之士預儲地方自治之才惟冀有如羅忠節曾文正胡文忠其人者出於其間他日救吾國救吾民是區區平日之志願也

振謹

案先生所訂無錫國學專修館學規載茹經堂文集卷二第二十四頁

是年修理潛漕始祖良鼎公墓當乾隆年間吾家頗盛七世祖宏任公經營良鼎公墓立有碑石名梅花墳餘地極多或云有七十畝或云四十餘畝粵匪難後盡爲族人盜賣祠堂亦被拆毀然聞吾祖父言尙有餘地十餘畝迨吾家赴京後遂變賣無餘並開墾及方基吾父掃墓時爲之下淚命以次修理至此三墓均修竣又有七世祖妣周太孀人節孝牌坊已迷失數十年矣吾父屢命訪求之前年朱誦六表兄竟訪得之在劉河土山後尙

屬完好兩旁石柱刻聯云聖德齊天垂片石清心同月映孤松其額云 皇清特恩施表已故儒童唐天極妻周氏給帑建坊其年月則剝蝕不可辨考金氏劉河紀略載節孝唐周氏於乾隆三十八年江蘇巡撫薩載彙題請 旨給帑建坊其後裔議敘縣佐唐承照領帑於乾隆四十六年建節孝石坊於顯佑山後云云據此則建坊時當在乾隆四十六年紀略內稱諱承照者卽家譜所載斗光公也以百六十餘年之舊物一旦訪求得之吾父精誠所感者至矣尙有翁仲二爲鄉人移置他處庚申年出資贖回每屆清明掃墓當往瞻拜子孫其永誌之

辛酉五十七歲

正月新生陸續來見二十日開館余親自上課每日二節講論語孝經孟子請朱君叔子爲本館教習並請門人陸生景周名修祐爲助教景周於前數年處館余家授慶詒等課兼司筆札深資得力

與施君省之議刻十三經近時吾國學生皆畏讀經苦其難也爰搜羅十三經善本及文法評點之書已十餘年矣自宋謝疊山先生至 國朝曾文正止凡二十餘家頗爲詳備

施君聞有此書商請付梓余因定先刻十三經正本冠以提綱附刻先儒說經世鮮傳本之書而以評點文法作爲劄記謹作敍文並請陳太傅弼庵名寶琛撰序命上海刻字舖朱文記經刊分校者太倉陸君蓬士王君慧言李君慰農徐君天劬及陸生景周期以三年竣工 振謹案先生所作施刻十三經序載茹經堂文集卷四第一頁

六月編茹經堂文集定初編爲六卷二編爲九卷 振謹案先生文集已刊者有茹經堂文集六卷卷一爲經說類共十七首卷二爲雜著類共五首卷三爲論辨類共五首卷四爲序類共二十二首卷五爲家乘類共十四首卷六爲雜記類及碑銘哀祭類共十五首有貫串百氏牢籠萬彙之概前四卷多發揮聖賢微言大義第五卷家乘多至性至情之文尤足感人第六卷載庚子拳匪亂狀關係國故而爲文博大精深實能於八家外別樹一幟又有茹經堂文集二編九卷卷一爲經說類共二十首卷二爲雜著類共七首卷三爲論說記文類共八首卷四爲書類共八首卷五爲序跋類共三十八首卷六爲傳類共二十三首卷七爲贈序壽序類共九首卷八爲碑銘類共二十二首卷九爲哀祭類共十一首較初編別有擅勝之處蓋初編較謹嚴二編更爲豪邁經說淹貫漢宋雜文本源

經子出入韓歐至於喚醒世道人心尤有裨益其三編亦已編定爲八卷正待付刊云

無錫中學主任江君霄緯教務長周生緝庵均辭職改請高生踐四爲主任唐君桐侯名錫恩爲教務主任

七月慶詒由歐洲回國吾父甚慰旋由外交部派爲華盛頓會議祕書十月間復赴美

十月國學專修館遷居本邑 文廟旁尊經閣先是本館請邑紳孫君鶴卿名鳴圻爲館董孫君因舊時金匱縣訓導署廢棄可惜錫邑原有尊經閣爲明成化時所建燬於兵燹乃捐資於訓導署舊址重建尊經閣修理餘屋由十七鄉公呈縣署立案旋經縣署知照請本館遷入邑紳楊君翰西名壽楣復助成之旋陸君勤之復籌款建宿舍樓房五楹至是遷入余爲立碑以紀孫楊二君之德 振謹案先生所作無錫重建尊經閣碑記載茹經堂文集卷六第三十六頁先生又有孫君鶴卿墓誌銘已編入茹經堂文集三編尙未刊

冬招考新生一班共錄取三十名

十二月聘廣西陳生柱尊名柱爲本館教習柱尊本任梧州中學校長辭之來助余其文

學鴻博可喜也

振謹案先生有贈陳生柱尊序載茹經堂文集二編卷七第五頁又

有與陳生柱尊書載同編卷四第十四頁又有覆陳柱尊論格物書已編入茹經堂文集三編尙未刊又有守玄閣詩學序載茹經堂文集卷四第三十八頁說文解字釋要序載同卷第四十一頁中庸通義序載茹經堂文集二編卷五第三頁皆爲柱尊作

壬戌五十八歲

正月開館上課余講授左傳禮記大學中庸乃上課未及旬日忽患寒熱病頗劇亦因積勞故也功課請朱陳陸三君分任淹纏至三月杪始愈

三月慶詒華盛頓會議竣事回國

四月十八日娶長媳俞氏慶棠奉吾父命所有聘禮衣服首飾以五百元爲度此後娶婦不得溢出此數並告坤宅勿備妝奩其兄鳳賓欣然允諾慶棠來歸後賢而孝吾父甚喜曰吾不啻得一賢孫女矣

六月編洪範大義成分傳注政鑑析疑爲三卷上契堯舜之心傳下開周孔之統緒本治己以治人政治之學莫精於此矣 振謹案先生此書已刊入茹經堂全書中

刻陸文愼公年譜公自編年譜僅至中年同學江陰陳君慕周名宗懿續成之其世兄芝田寄余稿本已數年矣謹作敘刊印之

振謹案先生所作陸文愼公年譜序載茹經

堂文集卷四第三十六頁

冬編性理學大義成定周子二卷程子二卷張子一卷洛學傳授一卷朱子八卷每卷各冠以敘文及傳狀發明大義篇中精要處各加評語圈點學者得此講本可窺性理學之門徑矣

振謹案先生此書已刊入茹經堂全書中其各卷敘文並載茹經堂文集卷

四第四頁

癸亥五十九歲

正月開館上課余講周易及性理學大義

無錫中學在南門外羊腰灣建築新屋成諸生遷入高生踐四因其尊人所捐建築費尙有不敷並向各處募捐始得告成余爲立碑以紀始末

夏四月孫女孝純生慶詒出

六月無錫中學行第一屆畢業禮畢業生僅七名主任高生踐四教務主任唐君桐侯均

辭職維時余因體弱事煩亦決計辭去學生錢寶鈞韋煥章吳煒庠等來堅留數次幾至下淚余曰噫余對於校務未能盡職諸君感情乃如此厚也爰勉允留任請陳生柱尊兼主任並請堂弟靜之名文壽爲庶務主任靜之在北京就學時向住余家畢業於北京高等實業學校化學專科爲人極靜細

七月編政治學大義成余因中國政治學始自唐虞傳自洙泗而向無專書倘有外人詢及茫然無以對深可愧也爰編是書分奏疏公牘書函本論凡四門而本論十三篇指陳近時利弊尤爲痛切本學期卽用作課本 振謹案先生此書尙未刊惟序文載茹經

堂文集卷四第十二頁本論十三篇已編入茹經堂文集三編中亦未刊

選印國學專修館文集初編由教員選擇甲班兩年乙班一年之成績較優者余爲釐定之著於篇 振謹案先生有無錫國學專修館文集初編序載茹經堂文集二編卷五

第四十四頁

十月命諸生編輯朱子全集校釋余嘗聞寶應有王白田先生朱子文集注本爰函屬寶應劉生翰臣代爲訪覓旋得劉生復書謂家藏有王白田朱止泉兩先生朱集簽注甲子

完備朱墨爛然惟編纂不易祇可過臨云云余乃命館生王蘧常唐蘭吳其昌吳寶凌戴恩溥五人赴寶應劉家分鈔七日而蒞事回錫後復命王生蘧常悉心編纂得十餘萬言定名朱子全集校釋云諸生之自寶應歸也吳生寶凌贈余朱止泉先生文集四册余細讀之見止泉先生論朱子於乙丑歲悟道後專用力於涵養須用敬進學則在致知二語因之精義入神陽明編晚年定論固非然謂朱子膠於萬物而不事涵養者亦非也乃知止泉先生於朱子之學終身服膺寢饋更勝於白田且編有朱子聖學考略及朱子分類文選二書尤爲精密無倫旋王生購得分類文選示余劉生又訪得朱子聖學考略爲之大快 振謹案先生有朱文公文集校釋序載茹經堂文集二編卷五第五頁

十二月國學專修館行第一屆畢業禮先期練習講演印講演集初編復招新生一班與陸君勤之議設理學社陸續捐資選刻先儒遺集

甲子六十歲

正月開館上課

二月黃氏岳母病歿於余家岳母爲先妣胞妹德性溫良去年七月病寒熱淹纏不止遂

不起遺款洋百元平時所積存也疾革時命余此款修理外祖父墳墓建築蝴蝶牆門且曰汝母若在必極贊成款有不敷汝當助成之其孝思如此沒後余追憶先妣哭之慟內弟玉儒偕內子扶柩回太倉 振謹案先生有外姑黃太夫人事略已編入茹經堂文集三編尙未刊

寶應劉生來書云朱止泉先生裔孫憶劬名某刊刻止泉先生外集聞之欣慰卽擬序文寄去 振謹案先生所作朱止泉先生外集序載茹經堂文集二編卷五第十二頁

三月刻陳確庵先生周易傳義合闡十二卷是書爲安道先生遺書第一種於程傳及朱子本義多所發明向無刻本前數年聞太倉同鄉陸君星五名鴻曜購得鈔本余借鈔之如獲異寶遂撥理學社捐款刻之逾年告成

纂論語大義定本因初稿本注太簡略刪改二次採李文貞陸清獻二公黃薇香太夫子劉楚楨先生諸家說加以按語較爲精深適施刻十三經成遂附刻於後及後講貫覺意義尙多未盡學問本無止境也

五月與諸同志集貲刻同鄉沈卽山先生文集先生文章爲明七子嫡派咸同問太倉顧

雪堂先生名師軾曾爲排印友人錢君復三王君慧言等建議付梓余爲致書旅滬同鄉會及陸君勤之分捐款項刻成之余爲書後一首頗嗚咽呈諸吾父竟爲心傷落淚乃大驚急撤去嗚呼孰知其爲不祥之兆耶

振謹案先生所作書沈卽山先生詩文鈔後

載茹經堂文集二編卷五第六十二頁

六月無錫中學行第二屆畢業禮

劉生啓瑞又來書云朱君憶劬擬刻朱子聖學考略請爲作序並屬王生蘧常代爲校字大爲快慰謹擬序寄去旋吳生其昌在天津圖書館鈔得朱止泉先生宗朱要法一卷卽寄劉生屬其附刻於聖學考略後

振謹案先生所作重刻朱止泉先生朱子聖學考略序載茹經堂文集卷四第二十七頁

七月江浙兵事起齊燮元盧永祥戰於劉河黃渡等處此禍醞釀已久余逆知戰事必不能免先期電達曹錕吳佩孚並齊盧兩處痛哭流涕求其和解曹吳未復齊盧復電均稱倘人不犯我我不犯人也至七月下旬事益亟江浙紳士惶急主議緩衝乃浙盧派員到會而蘇齊杳然至八月三日遂開戰兵士騷擾淫掠百姓流離慘不忍言幸旅滬同鄉

會設立兵災善後會項君惠卿等主其事救出劉河同鄉人不少旋李生頌韓等來錫避難靜之弟內姪婦盛氏隨其叔徐韻梅自白鶴港逃來亦暫住余家

九月中旬盧永祥出走北京馮玉祥兵變 清帝蒙塵避日本使館旋避天津痛心之至余發二電致段祺瑞請其保護 皇室均未得復

無錫溥仁慈善會赴劉河等處放賑乃命僕人高福偕往探視先塋揚子涇無恙潛漕松岩公墓旁掘濠溝數道幸未傷及棺木當卽飭人填平高福歸時帶回劉河避難幼童金根全名有明其父母均中流彈而死無所依吾父命住吾家入小學讀書旋同鄉會吳君挹峯來函云劉河難民逃回者因房屋被焚甚至宿豕圈中度日情形慘極商請陸君勤之借填洋三千元放給鄉民令其搭蓋草屋俾得棲止

十二月國學專修館行第二屆畢業禮招考新生一班

是月奉天兵將南來齊燮元又率兵抗拒之卽以無錫爲防守地時慶詒在上海十二日聞信急歸迎吾父不欲往命內子等赴滬十四日夜三鼓忽聞吾父痰哮聲急起視曰無妨適起覓火不得耳至十五日早尙食鷄子二枚旋卽病飲食不進卽請錫醫鄧君星伯

診治云老年重傷風宜謹慎余因春夏以來吾父已有神思恍惚不能記憶之症心知其

危十七日發快郵促內子等歸乃十八日火車已斷手足無措電促慶永歸

時肄業金陵大學

二

十日慶永乘江輪繞道江陰回而吾父氣喘痰湧病日亟迭延王君子柳華君實甫診治無效二十二日內子等在上海始覓得小輪回而吾父於二十四日巳刻已棄不孝而長逝矣二十三日夜尙問慶詒等歸否嗚呼痛哉午後內子等始抵家嚎哭欲絕衣衾等先由靜之弟督飭老僕吳本樹佈置棺木請宗弟申伯購買甫運入城遽聞蘇奉軍開戰城門卽閉是夜小殮禮成後鎗礮聲四起亂軍已在城外搶掠矣嗚呼吾父豈因此而急求解脫耶痛哉痛哉檢視篋中得遺囑數頁乃本年二月中所書命不作佛事不刻文集不題像贊不述哀啓其後託沈生健生裝裱冊頁以示子孫二十六日行大殮禮時城門嚴閉來弔者僅孫君颺香朱君叔子陳生柱尊及專修館學生十餘人

乙丑六十一歲

正月初二日蘇奉軍戰於惠山礮聲終夜不絕初三日巳刻齊燮元逃奉軍追至崑山秩序安靜越三日開城初九夜忽又聞鎗礮聲疑亂兵入城搶掠舉家頗驚惶余命嚴閉門

戶至天明探聽始知奉軍火藥庫失慎也

二月二十八日設奠官紳來弔者百餘人又國學專修館及無錫中學學生亦百餘人無錫縣知事林君幹才名黃植警察所長宋君靜庭名鎮濤太倉縣知事沈君希白名兆九均親來弔太倉同鄉陸君勤之等來者十餘人可感也

三月初十日扶柩回劉河安厝先靈堪輿劉河李君汝綱擇定明年正月安葬作蔚蒿哭詩四十九首痛心之至旋又作續蔚蒿哭詩十一首

六月下旬到館上課

六月無錫中學行第三屆畢業禮余因居憂未往

作軍箴四卷一法守二戒律三孟子格言四先賢遺範擬作爲陸軍學校課本先是岑宮保雲階名春煊見余所著人格甚好之謂其中軍人格尙慊簡略宜別爲一書後溧陽周君敬甫名仁壽來書所見適相合爰於暑假時茹痛屬稿岑周二君捐貲印行之 振
謹案先生此書專以勝殘去殺喚起軍人愛民之心爲主旨倘軍人能篤守之則中國可
強世界之殺機亦可稍息矣已刊入茹經堂全書中先生又有周君敬甫墓誌銘已編入

茹經堂文集三編尙未刊

託沈君健生在長沙印性理大義惜校對乏人魯魚之誤甚多可惜也

三兒慶增在美國哈佛大學畢業得經濟科碩士學位至六月杪回國拜謁先靈一堂慟哭

七月二十五日孫孝宣生慶詒出

九月編輯國文經緯貫通大義余初編讀文法次第推廣爲四十四法命名經緯貫通大義口授諸生熟讀之蓋余向主道德教育迨閱歷世變始悟性情教育爲尤急論語陽貨篇詳論人心風俗之本第二章特言性相近其後卽言聞弦歌之聲命小子學詩伯魚爲周南召南又答宰我問三年之喪皆性情教育也厥後子思子作中庸孟子作七篇皆本此意故居今之世教授國學必須選擇文章之可歌可泣足以感發人之性情者方有益於世道也 振謹案先生此書已刊入茹經堂全書中

謹述吾父事略一篇並石印手書格言一卷 振謹案先生所作先考府君事略載茹

經堂文集卷五第四頁

十一月謹檢先人遺集作家祠藏書謹志及藏救生繩謹志 振謹案先生所作家祠

藏書謹志載茹經堂文集卷五第三十四頁家祠藏救生繩謹志載同卷第三十七頁

丙寅六十二歲

正月初五日率內子慶詒慶增慶永等赴滬坐汽車赴劉河爲吾父營葬時連日陰雨初

七日懸棺入窆天適大晴劉河親友送葬者二十餘人陸君勤之自太倉來李生頌韓自

新塘市來而王君熾甫先兩日自太倉至劉河秤灰督工俱請其主持初七初八兩夜均

至三鼓始臥感激之至初九午前圓珠一切工程均與葬吾母同

吾母城起視時毫無損壞熾甫云此上等工程也

謹作簡誌命慶詒書方磚上納於壙首午刻痛哭別墓是晚住塘工局初十日赴漕漕省

墓十一日回無錫作再續蔚蒿哭十二首

表弟朱君壽臣名大椿言友人朱君叔湄名錦濤藏有金逸儒先生所撰劉河紀略內有

高祖墨池公序余因借讀之內有五世祖南軒公傳節孝志內有四世祖妣周太孺人傳

卽在土山旁建節孝坊者也此書深可寶貴惜體例稍雜文字亦尙有俚俗處倘有人潤

色而增補之則成大觀矣叔湄壽臣請作跋文謹作一跋附於卷尾 振謹案先生所

作劉河紀略跋載茹經堂文集二編卷五第五十九頁

三月二十日開館上課

刻高忠憲公別集成是書係沈子培師所贈余爲作序已三十年矣至此志願始遂

六月無錫中學行第四屆畢業禮余仍未往

是夏酷熱異常爲平生所未經疫癘極甚孫女孫兒均病延俞甥鳳賓診治始得先後就瘥可感也

山東瑯琊道尹溧陽周君敬甫好善士也前曾印余所著人格軍箴各千部及見吾父所書格言手蹟大好之書來囑印千冊并自作跋文景仰甚至爲之感泣

門人金生叔初名紹基刻余茹經堂初集告成李生頌韓以刻二集爲請爰以稿本付之校字者蔣生石渠名庭曜唐生堯夫名景升何生芸孫名葆恩而嘉定友人黃君虞孫與頌韓復爲覆校心甚感之譜弟曹君叔彥寄來茹經堂初集序一篇正大而有曲折之致人之相知貴相知心讀之慨然有動於中也

十二月國學專修館行第三屆畢業禮印專修館文集二編

是月二十四日吾父喪已大祥矣追念甲子年彌留時之苦痛澈於心作三續蔚蒿哭二十八首

丁卯六十三歲

正月編蔚蒿哀二卷作胡吟石公傳略附於第二卷內公諱溶爲吾母高伯祖乾隆癸酉解元應鄉試時聞同舍生語忽有會悟遂得佳文是科第二名吳維鏗亦吾婁人一時傳爲盛事詳傳文內 振謹案先生所編蔚蒿哀二卷已刊胡吟石公傳略並編入茹經堂文集三編尙未刊

初編禮記大義從祭義篇始

二十日開館上課是月革命軍入蘇

二月二十四日行釋服禮白駒過隙哀痛彌深盡情一哭

革命軍之入蘇也有共產黨雜其間錫邑教育局長徐夢影共黨也本不以專修館爲然有朱某者具呈請封閉專修館徐夢影遂令解散館生崔履宸張惟明路式遵等赴縣署力爭不能挽回余卽於二月二十六日辭職又有童某者訐告余把持無錫中學校務余

遂一併辭去維時外間盛傳余爲保皇黨復辟黨又有將封余住屋之說頗岌岌可危余以鎮定處之施工會解散辦理清黨主持公論者頗多始得無事其後徐夢影逃上海聞已伏法矣

四月二十一日三兒婦周氏四兒婦陸氏來歸均賢孝深可喜也

五月二日館生崔履宸路式遵迎余復職同人咸回館而沈君健生自專修館解散後常住余家照料一切始終未去尤爲可感館中因軍隊駐紮房屋牆壁頗有損壞此次恢復崔路二生之功居多崔廣西人路宜興人也

五月八日孫女孝端生慶詒出

六月改國學專修館爲國學專門學院添招新生三十名惟經費不敷擬募捐以濟之是月爲兩新婦授國文課兩婦作文尙優秀

八月行開院禮添聘錫呂錢君子泉名基博爲教授錢君博聞強識品詣亦敦潔英爽陳生柱尊辭職改聘門人馮振心名振繼之

九月門人李頌韓逝世赴至日余適小病家人匿不以聞越數日頌韓子家俊以書來乞

傳余大駭追念舊游於邑不置爲作傳文一首 振謹案先生所作李頌韓家傳已編

入茹經堂文集三編尙未刊

冬編紫陽學術發微共分十二類參考書共引用四五十種此後治朱學者當可得其門而入矣 振謹案先生此書共十二卷一爲學次第二已丑悟道三心性學四論仁善國五經學六政治學七論道釋二家八辨金谿學九辨浙東學十晚年定論評十一十二朱學通論上下於紫陽畢生學術提要鈞元洪纖畢備自李榕村王白田兩先生後未有能道此者可謂體大而思精矣已刊入茹經堂全書中其自序並編入茹經堂文集三編尙未刊

表甥俞鳳賓擬排印太崑先哲遺書並請將高祖墨池公詩鈔及先大夫詩賦鈔列入其意甚爲可感謹爲作序一篇 振謹案先生所作太崑先哲遺書序已編入茹經堂文集三編尙未刊

十二月二十二日放寒假二十三日招考新生取十九名

是冬刻奏疏告成 振謹案茹經堂奏疏凡三卷首卷條陳時務與朱子封事後先媲

美二三兩卷則先生在農工商部所作章程條例燦然具備吾國各項要政肇端於此至如創設商會釐訂商律爲功尤鉅已刊入茹經堂全書中

戊辰六十四歲

正月元日輯家譜世系傳狀藝文志告成 振謹案先生所輯家譜中傳狀及藝文志

尙未刊

二十日行開院禮

是年余爲諸生講尙書編尙書大義內外篇成外篇考今古文源流內篇發揮每篇精義多有先儒未經道者 振謹案尙書大義分內外二篇外篇敘今古文源流采擇精博斷制謹嚴擷江段王孫諸家之菁華內篇分堯典皋陶謨洪範康誥召誥立政六篇爲政治學湯誓盤庚西伯戡黎微子金縢大誥洛誥無逸君奭多方呂刑費誓文侯之命秦誓十四篇爲政鑑於禪繼大義著作本源闡發無遺尤精者如論洪範八政呂刑刑法費誓軍紀與周秦二代盛衰存亡之故均足以昭示來茲振興世運附尙書應讀書目表則分專門書專篇書參考書三類焉已刊入茹經堂全書中其敘文並編入茹經堂文集三編

尙未刊

五月杪行畢業禮畢業者崔履宸等十二名

六月擬編詩經大義分倫理性情政治學等凡八類因衆說浩繁僅訂序目

七月行開院禮考取新生五十名

是夏四兒慶永在光華大學畢業七月十一日赴美入西雅圖華盛頓大學旋轉入中美奧海州立大學肄業學經濟科

八月患痰病俞甥鳳賓自上海來診治始獲痊愈甚矣吾衰深爲慨歎

國學院具文請大法院立案迄未覆准至九月間派丹徒柳君翼謀無錫薛君頌華來院調查二君回京報告謂本院成績斐然辦理完善旋奉大法院批准立案

十月先高祖愛蓮居詩鈔先大夫浣花廬詩賦鈔均印成俞甥鳳賓作跋文厚意殷拳至可感也

茹經堂文集二編刻成本爲門人張貢九名廷金胡粹士名端行及俞甥鳳賓捐貲刊刻
李生頌韓經理其事頌韓病歿遂停工門人金叔初復出貲續刻始得告成

十一月北方告災前在各部署供職者飢餓不能出門戶甚至闔門自經友人溧陽周君敬甫辦理義賑余與蘇州費君仲深名樹爵向各處募捐共得一萬六千餘元無錫最出力者同宗保謙申伯昆仲及華君叔琴也

十二月二十日放寒假

己巳六十五歲

正月二日輯家譜墳墓志告成 振謹案先生所輯家譜中墳墓志尙未刊

正月九日挈長兒慶詒回太倉爲鄉先賢葉涵溪先生裕仁先師王文貞公入鄉賢祠事借住陸勤之親家宅中諸親友歡聚十日已刻送葉王兩先生入祠十二日赴劉河十三日掃墓瞻拜松楸愴然隕涕順道參觀集善堂育嬰極爲完善是晚住塘工局十四日回無錫

正月二十日行開院禮余因病未能往病中作太倉蟹斲記思親不置病十餘日始瘳

振謹案先生所作太倉蟹斲記已編入茹經堂文集三編尙未刊

課諸生禮記作禮記大義並研究法

輯論語大義外篇成嘉慶時有妄人崔氏述作論語源流考多引不經之譚謂論語後半部皆後人屬入余特作論語辨疑編入外篇中力斥其謬 振謹案先生此書詳載授受源流極爲精深尤要者辨疑一篇匡謬闡幽足破學者之惑後載師法表篇次章數表研究法表參考書目表元元本本指示學者康莊大道爲治論語入門必讀之書已刊入茹經堂全書中

五月杪行放假禮

六月胡生粹士陳生柱尊暨大兒慶詒鳩資印李生頌韓養廬詩文稿頌韓從余遊垂四十年感情最厚其平生志事不獲稍一展布僅留此稿吉光片羽流播人間伊可痛已余爲之序悽愴累日 振謹案先生所作李頌韓養廬詩文稿序已編入茹經堂文集三編尙未刊

七月行開院禮考取新生五十六人

課諸生周易編周易十二辟卦消息大義

是秋請蘇州單君束笙名鎮爲國學院教授余以詩經大義授之請其採擇傳箋別作注

釋

九月國學院圖書館告成行落成禮是館爲本邑孫君鶴卿遺命捐建院董蔡君文鑫兼三宗姪炳源星海等竭力贊成共費六千五百元親家陸君勤之捐書壹萬伍千餘冊元明精本甚多約共值二萬數千元可感也

九月十一日孫女孝英生大兒慶詒出

十一月教育部令改國學專門學院爲國學專修學校

十二月十七日放寒假

庚午六十六歲

正月二十日行開校禮余仍教授論語及禮記諸經

二月輯陽明學術發微自明季講學之風流弊日甚於是王學爲世所詬病實則陽明乃賢智之過其倡致良知之說實足救近世人心日本服膺王學國以駁強余特發明其學都凡七卷其中四大問題及陽明學通於經學二卷頗爲精審較之二十年以前喜關陽明自覺心平而氣和矣 振謹案先生此書共七卷一講學事蹟二聖學宗傳三陽明

學四大問題四良知經學五六通貫朱學七龍溪述學髓薈萃英鈞元提要實功利派之要藥也已刊入茹經堂全書中其自序並編入茹經堂文集三編尙未刊

五月杪行畢業禮卽放暑假畢業者學生許壽平等二十餘人

六月三兒媳患傷寒證頗重表甥俞鳳賓在上海代請朱醫仰高來診治無錫許醫松泉佐之旋愈

七月四兒慶永由美國回慶永在美奧海州立大學畢業得經濟科碩士學位繼入哥倫比亞研究院續讀半年因金價日益昂貴美金一元約中國洋四元以外而在美用度每月需金洋九十元不得已令其回國順道至歐洲遊歷旋卽在上海交通大學就教授職

八月考取新生兩班共八十六名

輯紫陽學術發微成初於教授性理大義中朱子諸篇不能挈其綱要後取王白田朱止泉秦定叟諸先生書讀之略事分門纂述粗有成書本年購得夏弢甫先生述朱質疑更覺秩然有條理爰仿其意編輯是書後附陸桴亭顧亭林諸先生之評論朱子學者得九家爲九賢朱子學論頗足發明朱學源流書成後卽付印

朱生貫微寄贈余十二朝東華錄因余將輯咸同光宣四朝實錄也意甚可感旋余又購得李氏國朝耆獻類徵一部共四百冊

十月表甥俞鳳賓卒痛惜之至鳳賓天性孝友謙謹和平學習西醫留學美國得衛生科博士學位回國後視人之疾如己之疾體恤貧寒無微不至刊印太崑先哲遺書有功鄉先賢不淺先高祖愛蓮居詩鈔先大夫浣花廬詩賦鈔皆其所印其沒也長兒慶詒兒婦慶棠哭之尤慟慶棠卽鳳賓胞妹也余爲作墓碑文一首下筆時亦爲之揮淚云 振
謹案先生所作俞鳳賓墓誌銘已編入茹經堂文集三編尙未刊
十一月孫女孝慧生慶詒出

是冬教育部令改放陽曆年假不得再用陰曆並不得再放寒假

十二月四日

卽陽曆二月一日

行本校十週年紀念並第六屆畢業禮畢業者學生陸寶和等十

七人是日校董穆君藕初名湘珩來主席上午訓辭午后開游藝會頗極一時之盛

辛未六十七歲

正月二十日行開校禮余編禮記大義數篇示諸生

比因家中生齒較繁房屋不敷居住爰與慶詒等謀在前桑區建樓房三楹以舊年售得田價託建築公司江生應麟承造二月初動工慶詒等竭力補助經費迨後遇水災國難心甚悔之

三月無錫溥仁慈善會赴陝州放賑修理陝州召伯甘棠祠余爲作碑記一篇摹仿昌黎頗能駸駸入古 振謹案先生所作陝州召伯甘棠廟碑已編入茹經堂文集三編尙未刊

去年中央軍與閻錫山馮玉祥戰爭曲阜孔廟孔林爲礮火所燬周公顏子二廟亦遭灰燼爰約徐君固卿名紹楨曹君叔彥等二十餘人具呈政府請撥款修復旋得復不過一紙空文遂致擱置可痛矣哉

五月杪行畢業禮卽放暑假畢業者學生郭則融等三十餘人

六七月間大雨滂沱幾近一月楚贛皖蘇各處皆成巨浸始則漢口被災最重繼則江北高郵興化等處因建設局員茅以擘開運河堤河水與洪澤湖合流氾濫更甚江北各縣無不糜爛吾鄉劉河寶山海塘沖塌天災人禍相逼而來余急電旅滬同鄉發起救濟會

並撰急救水災議徧告同鄉無錫設立水災籌賑會推余爲理事長有心無力抱愧之至
振謹案先生所作急救水災議已編入茹經堂文集三編尙未刊先生又有續救水
災議及學校當研究水利議二篇亦此時所作蓋先生關心民瘼坐議起行非徒欲載諸
空言而已

上年閱報章 先朝高宗暨 孝欽后陵寢迭爲盜匪掘竊殉具至是復有 太宗母后
陵墓被掘之事慘痛已極爰約曹君叔彥周君敬甫等具呈北京張學良副司令暨于學
忠軍長請嚴緝盜犯一面派兵保護旋敬甫寄來復函照議辦理

函聘福建陳君石遺名衍爲本校講師陳君爲余壬午鄉試同年出寶竹坡先生門下佐
張文襄公幕十餘年學術閎通著作詩文極夥門人葉長青紹介來校深爲可喜

七月行開學禮考取新生六十名

八月十三日次孫孝威生四兒慶永出

九月東北難作先是吾國內鬩不已寧方與粵方失和而北方石友三起事政府命張學
良平之遂飭張坐鎮關內日本乃乘隙而入襲取瀋陽旋攻去黑龍江省師長馬占山苦

戰半月張學良擁兵不救馬退守克山日人又攻取錦州張又撤兵入關喪師失地全國震駭蓋近年以來人心日壞罔利營私無惡不作侮慢聖賢荒道敗德以致蓄害並至雖有善者亦無如之何矣余特作廢孔爲亡國之兆論一篇 振謹案先生所作廢孔爲亡國之兆論已編入茹經堂文集三編尙未刊

十月無錫溥仁慈善會赴太倉放賑余先命价高福前往河川毛市等鄉調查旋會中又請藍君仲和赴太主錢君誦三家總計同宗保謙弟捐放四千元余捐放一千二百元棉衣二千件此事之成實賴保謙與淞源宗姪之力淞源爲同宗申伯弟之子同鄉感頌無涯

十一月上海設立國難救濟會由馬君相伯名良等發起推余爲會員余作新六國論一篇痛陳利害並著國鑑一卷共分十三篇卽以新六國論冠於首印刷分送藉以警醒人心 振謹案先生此書已刊入茹經堂全書中陳石遺先生所撰先生全書總敘謂與人格軍箴諸書可謂瘖口曉音惟力是視者也

十二月二十三日上海難作先是日人要挾上海市長吳鐵城取消抗日救國會等四條

款吳勉強應允以爲可以無事矣詎料二十三日夜日人竟冒大不韙攻擊開北寶山路北四川路等處焚燒殺掠慘無人道上海損失約八千萬以上商務印書館東方圖書館均付一炬十九路軍軍長蔡廷楷與蔣光鼐戴戟翁照垣等歃血爲盟誓師禦寇當夜大敗之而日兵艦縱橫海上絡繹而來連日攻戰不已政府遷徙洛陽後愚不知所底吾民何辜遭此荼毒蓋數百年來未有之浩劫也

壬申六十八歲

正月十九日開校因國難故學生來者僅三四十人

正月中旬日人遣老將白川來攻上海白川至謀用側擊之法二十五早用煙幕彈由太倉浮橋劉河兩海口登岸其時援兵不至後方僅有上官雲相一軍未經戰陣自顧不暇且風聞有搶掠之事蔡廷楷等不得已退守崑山日人在劉河嘉定大場吳淞等處大肆焚掠十九路軍支部退太倉敵從之在太倉城內擲炸彈數十枚毀民房十餘處軍民慘死者甚多余在無錫二月朔日先有州橋陸姓母子三人來投奔余家余因其時學生甚少暫以校外宿舍爲收容所自出貲收養之二月三日劉河保衛團長黃君頌聲來商量

寄存鎗械事四日太倉門人陸恩瀾來述城中親友避難狀余既痛太倉被禍急應救濟而劉河先塋未卜安否爰與同鄉吳君昆生商量雇定申新紗廠貨船赴滬校中功課請錢君子泉等暫代於初八日早啓程初九午刻舟抵前山泖河武帝宮側遇盜放鎗行劫幸小輪疾駛得脫事詳王申遇盜記初十日抵上海住愚園路愚園坊三兒慶增寓中

振謹案先生所作王申遇盜記已編入茹經堂文集三編尙未刊

二月十二日太倉同鄉項惠卿張綸卿表姪朱懜儔等來商量救濟事因沿途搶劫頗爲棘手十三日在表姪朱生繼莘家中再會商擬託崇明王君丹揆及黃君伯鈞在崇明設立收容所一面雇大船六艘在蕩茜等海口往來救接同鄉難友公推黃君頌聲赴崇接洽旋得覆信悉丹揆伯鈞允代設收容所六處惟錢米概由太倉同鄉會接濟十五日余往見王一亭君請其收留在滬同鄉十六日往見朱子橋君請助捐款朱允助二千元十七日赴張君綸卿處會議同鄉救濟會成立推余爲會長十八日致函史量才黃任之王曉籟杜月笙諸君請在上海地方維持會中撥捐款項旋黃史二君來談許撥五千元可感之至史君並贈余壬辰年殿試策蓋渠在大內出賞購得者也語詳壬辰殿試策自跋

二十日聞實業廳長何君玉書來滬由愷儔聯合嘉寶兵災救濟會請求撥款賑濟並購棉子等事何君允以去就力請至誠可感一面並電請財政廳長舒君來滬會商旋各救濟會員赴鎮江請賑余委託愷儔代表嗣後請得六萬餘元先後散放 振謹案先生

所作壬辰殿試策自跋已編入茹經堂文集三編尙未刊

三月初一日赴徐家匯模範中學演講沈君叔達沈君同一並舊同學張松亭王叔賢等齊集諸生靜穆無異昔年余在校時深爲可喜

余忽患腰痛連及腿部上下樓見客送客頗以爲苦表姪朱生繼莘來贈藥甚可感後至六月間始愈

初五日劉河墳丁何桂林來見報告先塋無恙喜甚並悉伊家眷住崇明當囑以婦女勿遽回劉惟男丁可由海口還家播種棉子越日王君丹揆朱生貫微先後來滬余幸先塋無恙賑務亦粗有頭緒卽於十一日偕同長兒婦慶棠並僕人高福回錫坐滬杭車啓行是日住杭州西湖飯店四兒慶永來接蓋渠在之江大學教授也十二日早在西湖邊小坐胸襟爲之一暢午後坐汽車至湖州途中景緻清幽惜風極大是晚至湖州住中央大

旅店十三日早乘小舟至太湖口登錫湖輪船舟中魚片風味極佳爲平生所未嘗申正抵無錫西正抵家頗動蒼涼之感十四早到校上課

三月二十日赴保謙申伯兩弟處懇請溥仁慈善會捐助太倉義賑募得七千元余自募得五百元又在上海兵災救濟會撥一千五百元沙溪黃少彭君爲樸丞弟親家善士也亦募捐一千元共一萬元由無錫藍君仲和暨錢天福高福陸續赴湖川毛市新豐及浮橋楊林七丫義橋等處散放賑款高福歸述鄉民被災狀極慘有新豐人包某被飛機彈炸死遺一妻三子慘不忍言急賙卹之迨至六月間余又募得千元命高福赴劉河茜涇新塘市三處放賑詳情載王申救濟錄中

太城被難時文荃弟婦馬氏臥病在北行弄之寓所小樓爲炸彈震死尸附床坍入鄰舍陸君蓮史家慘痛之至余爲作碑銘一篇旋又作太倉軍民殉難碑記一篇在無錫刻石運赴太倉嵌入城隍廟內之公所友人錢君誦三等並爲立主致祭 振謹案先生所作弟婦馬氏殉國難碑銘及王申太倉軍民殉難碑記俱已編入茹經堂文集三編尙未

刊

五月杪放暑假維時學生約到七十人畢業者郭則湘等二十二入

七月八月兩次招考新生來試者尙踴躍共取八十六名八月十四日開校學生先後到者一百六十三人別設補習一班春間因時局不靖校董捐款及學生所繳學費均停滯不得已實行減薪教員減三成職員減四成惟月薪三十元以下者不減諸同人辛苦維持至是始得復舊

九月仿大戴禮記踐祚篇銘詞之例作民性等箴共五十六首自尊孔教致良知旁逮婚喪祭禮下至衣食住行莫不有箴箴者針也將以針人心之疾病也嗚呼七年之病三年之艾苟爲不蓄終身不得孟子早言之矣厥後編爲一卷名曰國箴 振謹案先生此書已刊入茹經堂全書中

九月八日孫女孝慈生慶永出

九月杪大兒慶詒患目疾網膜脫落勢極危殆急赴北京協和醫院診治有奧國醫生披拉治目爲世界第二人惜已將回國僅施手術一次約愈十之三四繼之者爲中國畢姓醫生效果甚遲頗爲焦慮

十一月日人攻陷山海關並襲取九門口海軍在秦皇島登岸河北岌岌可危詩曰日蹙國百里可痛矣哉

十二月下旬放寒假時適大雪積五六寸因整飭校風令退學者十三人

癸酉六十九歲

正月中旬開校學生到者一百四十餘人日人攻熱河主將湯玉麟逃避熱省淪陷日人卽由山海關進攻京東寶坻玉田等處襲取京北高麗營距北京城僅五十里當道遺黃郭赴津議和並派何應欽駐紮天津吾國門戶洞開何以善其後乎

三月清明節偕三兒慶增回劉河掃墓住表姪朱愷儔宅中歸途赴蘇州訪譜弟曹君叔彥暢談並購孫氏周禮正義一部

四月重印陸桴亭先生遺書因版片收藏家祠中着地潮溼以致霉爛一百八十餘版卽寄蘇州王慧言君處交手民陳海泉重刻糜去三百餘金印費因之短少僅印八十部後人藏書版者務宜置高燥處按時檢點
五月放暑假畢業者俞振楣等十九人

自正月間大兒慶詒由北平回卽偕兒婦慶棠赴奧國治目疾慶棠並赴丹麥倫敦各處考察鄉村教育至六月間回國慶詒目疾依然未愈天道求闕祇可委心任運耳

六月與錢君子泉商議將國學專修學校校舍改建兩造共十四幢計費共一萬二千八百元落成後佈置膳堂懸王文成高忠憲顧亭林陸桴亭四先生遺像並摹刻先師左文襄公所書楹聯並改建忠義孝悌祠計費三百四十餘元祠費錢君與余分任之

七月招考新生投考者極踴躍錄取一百餘名八月開校實到新舊生二百六名請湖南陳君天倪名鼎忠爲教授品行篤誠學問淵博著作極夥真良師也

八月初蘇州國學會李君印泉名根源金君松岑名天翹等約余赴蘇演講爰於是月二十四日到蘇住福州同年陳君石遺家講論語孟子並性理大義二十五日早訪叔彥一談傍晚返錫講義印入國學論衡中 振謹案先生在蘇州國學會演講錄並編入茹

經堂文集三編尙未刊

本年七月間颶風爲災海口冲決崇明首當其衝淹沒田戶數千畝倒塌房屋數百家災民流離極慘在蘇晤譜兄王君丹揆請爲勸募發賑余向溥仁慈善會紅卍字會兩處盡

力設法幸宗弟申伯極爲出力共捐得三千元丁君梓仁捐得一千元上海同鄉會捐得三百元先後匯崇散放太倉亦受風災情形較輕由朱君懜儔顧生公亮募款散放

玉儒表弟爲張君亮生介紹請題其九世祖張天如先生遺像余作記一篇歷敘吾婁掌故適慶詒等爲余購天如先生漢魏百三家集一百冊讀其題辭門徑釐然文氣亦醇厚有味旋又作先師福建林燮軒先生墓表並同鄉畢君枕梅傳因悟文章變化法全在承轉提頓處有令人不測之妙爰編茹經堂論文一卷示諸生 振謹案先生所作張天

如先生畫像記林燮軒先生墓表畢君枕梅傳俱已編入茹經堂文集三編尙未刊茹經堂論文一卷亦未刊

余前編詩經大義分倫理學性情學等共八類吳縣單君東笙同鄉朱君叔子爲之注釋每篇後並標詩旨頗爲精覈金山高君吹萬名燮來索閱因寄去高君大嘆賞出貲爲印入葩廬叢書極可感葩廬者高君書齋名也 振謹案先生以孔門之教學詩曰興觀

羣怨事君事父多識而已事父事君倫理學也可以興可以怨性情學也可以觀政治學農事學軍事學也可以羣社會學也多識修辭學也倫理性情之精微義理學也於是作

詩經大義九卷卷首綱要卷一以下分選詩篇爲各學倫理十六篇性情十六篇政治十六篇社會十六篇農事六篇軍事十五篇義理十篇修辭八篇其詩經大義自序及八分類序並編入茹經堂文集三編尙未刊

十二月放寒假畢業者吳德明等十二人

寒假後整理禮記大義助余繕校者高君涵叔也共四十六篇分四卷而以類別提要表等別爲首卷 振謹案治禮記者多重考據名物而不知修己治人乃其基本先生此書掃盡支離獨標真諦專以反躬實踐爲主其中如曲禮內則樂記學記大學中庸哀公問孔子閒居儒行諸篇尤爲廣大精微允救時之良藥矣已刊入茹經堂全書及無錫國學專修學校叢書中

甲戌七十歲

正月中旬開校學生到者二百餘人

大兒慶詒因目眚未愈抑鬱成疾驚怖恐懼夜不能寐請錫醫鄧惺伯先生診治在家休養

二月禮記大義整理完竣又修改周易消息大義加入讀易反身錄一卷並應讀書目表一併交馮生振心校正付印 振謹案周易消息大義發明十二辟卦消息凡政治盛衰國家存亡人事吉凶得失進退之道靡不兼賅其中反身錄箴砭痛切書目表說明漢宋家法不墮空虛允爲學者必讀之書已刊入茹經堂全書及無錫國學專修學校叢書中

三月門人太倉胡粹士及無錫張貢九以余七十初度發起醴資在錫邑建築茹經紀念堂辭之不得由薛君明劍等相地於五里湖之琴山腰購地十畝許昔俞曲園先生在西湖建築俞樓自謂有玷湖山余不及曲園令望抱慚益甚矣

四月間教員太倉朱君叔子在錫寓病卒臨歿前一夕在余家小飲相敘甚樂不意翌晨猝患中風口不能言午後卽卒朱君品端學富文采斐然與余自幼相識五十年交情不勝慘怛遺著有莊子新義馮生振心暨諸同學爲之校印行世 振謹案先生有朱君叔子墓誌銘莊子新義序均已編入茹經堂文集三編尙未刊

校中增建盥洗室訓育吳君灑亭名良澍布置校景略種花木築一亭以茹經名同年陳

石老撰聯云栽培林木如名節枕蓆詩書此息游

五月放暑假畢業者李步青張尊五等十五名

月杪上海交通大學行畢業禮校長黎君曜生名照寰堅請余往演講爰赴滬見舊同學相與執手歡甚余離校已十有三年矣旋赴華東電氣公司灌留聲機片音讀文四篇

本年自春徂夏迄未得雨旱旣太甚禾苗盡槁讀雲漢之詩曰嗚呼何辜今之人痛心已極余家特開一井遍勸錫邑鄉人開自流公井無應者

教員常熟徐君管略名景銓在錫寓病卒身後蕭條錢君子泉與余設法募捐爲之料理而教員陳君天倪又辭職赴粵爰先後聘湖南劉君柏榮名樸廣東楊君鐵夫本校前畢業生錢生仲聯名萼孫分任教科

七月招考新生錄取一百餘名開校後新舊生到者二百七十二名

本學期余講授性理大義於周子太極圖說通書張子西銘程子論性篇及明儒王龍溪錢緒山王心齋諸先生學派皆有詳論擬編爲性理學發微

振謹案性理學發微先

生正在屬稿約明年可以成書云

八月十三日孫女孝綵生慶永出

高君吹萬函薦滬醫王君仲奇爲慶詒療病慶詒兩次赴滬至秋間逐漸痊愈

本省省政府督促民間申報地價將征土地稅余與邑紳迭次呈請緩辦未能邀准

十月十六日爲余生日因思程子有言人子於父母歿後生日當倍增痛豈宜張筵作壽
余恐親友來祝爰於是日赴劉河掃墓過滬時再赴華東公司灌音講演孝弟廉恥及讀
詩經左傳法

同年陳石老欲爲余作壽序再四辭之乃集余所著書爲總序洋洋數千言深可感謝惟
揄揚過當心殊不安耳

十二月放假畢業者鄭高崧等十七人

自朱子纂伊洛淵源錄後明薛方山應旂作考亭淵源錄陸清獻三魚堂集嘗徵引之余
訪求數十年不能得今冬忽得之於上海富晉書肆共二十四卷編輯精詳宗旨純粹乃
東人翻刻明板其卷端徐階薛應旂序亦係手蹟翻刻洵可寶貴因歎外人尊崇理學如
此國安得不興盛哉

除夕追思吾父爲善之訓敬撰一聯云目前福澤何來謹留有餘上對吾祖考此後善源
易竭急培不足申儆我子孫亦可以作家訓云

茹經先生著作年表

門人北流馮振謹編

例言

一所編先生著作以年譜所及各專書篇章與文集奏疏所載者爲限凡先生置諸外集暫不欲布之文概不列入

一凡專書中篇章有兼載文集中者亦並列之但見年譜不載文集者則不再列

一文集所載篇章其著作年歲有與年譜出入者概以年譜爲準

一凡專書非一年所成者以成書之年爲著作年歲

著
作
年
表
例
言

茹經先生著作年表

門人北流馮振謹編

甲申二十歲

禮記月令習五戎義 茹經堂文集二編以後簡稱卷一

原情文集二編卷二

乙酉二十一歲

陸象山言先立乎其大辨 茹經堂文集以後簡稱卷三

宋明諸儒說主一辨 文集初編卷三

樂無大夫士制論 文集二編卷一

丙戌二十二歲

易豐配主夷主義 文集二編卷一

讀焦禮堂孟子正義 文集二編卷一

著作年表

丁亥二十三歲

陳同甫與朱子辨論漢唐治法論二篇 文集初編卷三

易屯二爻辭義 文集二編卷一

易訟大象傳義 文集二編卷一

易蠱先甲後甲巽先庚後庚義 文集二編卷一

易升上爻消不息義 文集二編卷一

易既濟東鄰西鄰義 文集二編卷一

讀書湯誓 文集二編卷一

禮酬爵奠而不授辨 文集二編卷一

惡圓篇 文集二編卷二

戊子二十四歲

易師履臨大君義 文集二編卷一

易觀六四爻辭義 文集二編卷一

易坎九五爻辭義 文集二編卷一

易解朋至斯孚義 文集二編卷一

易渙渙汗渙血義 文集二編卷一

詩皇父考 文集二編卷一

魯詩有傳無傳考 文集二編卷一

禮親歿不得爲人後議 文集二編卷一

釋子六 文集二編卷一

漢書藝文志爾雅屬孝經說 文集二編卷二

賈生深於禮述 文集二編卷二

叔孫通所著書考 文集二編卷二

鄭君述漢律考 文集二編卷二

汲黯論 文集二編卷三

己丑二十五歲

著作年表

著作年表

思親詩

十月作
未刊

庚寅二十六歲

書嘉慶太倉州志後 文集二編卷五

辛卯二十七歲

祭李母王太夫人文 文集二編卷九

壬辰二十八歲

禮經校釋序

自注代程序東太夫子作
文集二編卷五

張海民遺集序 文集二編卷五

書左傳考釋後 文集二編卷五

書翁雲樵先生文集後 文集二編卷五

癸巳二十九歲

太鎮官紳義勇殉難瘞骨碑 文集二編卷八

甲午三十歲

請挽大局以維國運摺十一月
茹經堂奏疏以後簡卷一

郁夫人家傳自注庚戌改定
文集初編卷五

送嘉定徐季和先生視學浙中序 文集二編卷七

乙未三十一歲

與李生頌韓書 文集二編卷四

王葆卿先生六十壽序 文集二編卷七

顧廷一先生墓志銘 文集二編卷八

外舅黃浚之先生誄文 文集二編卷九

丙申三十二歲

上沈子培先生書 文集二編卷四

吳粵生先生六十壽序 文集二編卷七

丁酉三十三歲

高子外集序二篇 文集初編卷四

著作年表

著作年表

劉母郝夫人傳 文集二編卷六

戊戌三十四歲

謹殫竭血誠以維國脈摺 二月 奏疏卷一

請停止搜括之政片 二月 奏疏卷一

敬陳管見以固人心摺 三月 自注代沈子封師作 奏疏卷一

己亥三十五歲

與友人書 文集二編卷四

庚子三十六歲

紀徐桐崇綺事 文集初編卷六

紀庚子六月冤獄 文集初編卷六

寶夢蓮先生詩集跋 文集二編卷五

五忠詩 十月作 未刊

辛丑三十七歲

奉使日本記 自注代那大臣作
文集初編卷六

東瀛日記一卷 隨那桐使日本時作
未刊

游日光山記 隨那桐使日本時作
未刊

壬寅三十八歲

英軺日記序 自注代載大臣作
文集初編卷四

鄭公孫揮能知四國之爲論 文集二編卷三

陶母金夫人傳 文集二編卷六

英軺日記十二卷 代固山貝子載振編九月成
光緒二十九年文明書局印行

癸卯三十九歲

議覆張振勳條陳商務摺 七月 自注代載大臣作
奏疏卷二

擬商部章程摺 九月
奏疏卷二

聲明商部辦事權限摺 十一月
奏疏卷二

重刻周忠介公文集序 文集初編卷四

著作年表

著 作 年 表

二叔母徐孺人墓誌銘 文集初編卷五

正誼堂逸書序 文集二編卷五

甲辰四十歲

訂立商勳摺 正月
奏疏卷二

請設農工路礦各項公司片 正月
奏疏卷二

請設立商會摺 十一月
奏疏卷二

陸庚星遺稿序 文集二編卷五

于玉峯遺稿序 文集二編卷五

乙巳四十一歲

請設立勘礦總公司以保主權摺 七月
奏疏卷三

請籌撥勘礦總公司官股片 七月
奏疏卷三

請改定官制摺 七月
奏疏卷三

請立憲摺 八月
奏疏卷三

丙午四十二歲

請辦商業模範銀行摺三月 奏疏卷三

請調用人員設立儲才館摺閏四月 奏疏卷三

請遣派學生出洋片閏四月 奏疏卷三

請設各省農工商務監督以興要政摺六月 奏疏卷三

議覆北洋大臣政務處奏路務議員辦事章程不無窒礙摺六月 奏疏卷三

署農工商部尙書謝恩摺九月 奏疏卷三

丁未四十三歲

劉君葆真傳文集二編卷六

太倉方烈女傳文集二編卷六

陸貞烈女碑記文集二編卷八

蓄艾篇二卷五月成 未刊

曾子大義七月成二卷第一卷孝經大義已刊入全書中第二卷論孟中曾子語未刊大學大義別爲專書餘未成

著作年表

著作年表

戊申四十四歲

陸文慎公墓誌銘 文集初編卷六

彙刻太倉舊志五種序 文集二編卷五

知止齋文集序 文集二編卷五

國粹教科書續編序 文集二編卷五

女甥俞慶和哀詞 文集二編卷九

己酉四十五歲

孟子大孝終身慕父母論三篇 文集初編卷一並附孝經大義後

重印文文山先生集序 文集初編卷四

學校培養人才論 文集二編卷三

中學國文讀本序 文集二編卷五

國文大義二卷 十二月成
全書之一

庚戌四十六歲

說龍 文集初編卷二

箕子論 文集初編卷三

曾文正公日記序 文集初編卷四

王考府君事略 文集初編卷五

先妣胡太夫人事略 文集初編卷五

歸高陽姊氏墓誌銘 文集初編卷五

外祖古愚胡公家傳 文集初編卷五

安雅堂文稿序 文集二編卷五

陸文慎公奏議序 文集二編卷五

三省樓贖稿跋 文集二編卷五

金竹庭先生傳 文集二編卷六

國文陰陽剛柔大義緒言 茹經堂文集三編

以後簡稱卷一
文集三編卷一

辛亥四十七歲

著作年表

著 作 年 表

古人論文大義二卷 十二月成
全書之一

王子四十八歲

四兒孝長字說文集二編卷三

陳硯香先生傳文集二編卷六

朱湘舟先生傳文集二編卷六

憶苓女姪哀詞文集二編卷九

人格一卷 六月成
全書之一

國文陰陽剛柔大義八卷 十二月成
已刊未再版

癸丑四十九歲

論語鄉黨篇大義文集初編卷一

論語微子篇大義文集初編卷一

論語子張篇大義文集初編卷一

駁學校不祀孔子議文集二編卷二

論語大義二十卷 十二月成後又修改爲定本全書之一

甲寅五十歲

孟子滕文公篇大義 文集初編卷一

釋氣 文集初編卷二

與曹君叔彥書 文集二編卷四

工業專門學校國文成績錄序 文集二編卷五

沈君竹初傳 文集二編卷六

祭表姊俞室顧夫人文 文集二編卷九

乙卯五十一歲

孟子離婁篇大義 文集初編卷一

穀梁傳選本跋 文集二編卷五

哀二薛文 文集二編卷九

孟子大義七卷 十二月成全書之一

著作年表

丙辰五十二歲

大學大義自序 文集初編卷一

中庸通義序 文集二編卷五

黃君闇伯傳 文集二編卷六

贈陳柱尊序 文集二編卷七

大學大義一卷 十二月成
全書之一

丁巳五十三歲

書洪範言無黨論語言不黨論 文集初編卷一

中庸大義自序 文集初編卷一

孟子善戰者服上刑論 文集初編卷一

謁 孔陵文 文集初編卷二

外舅郁銘軒先生家傳 文集初編卷五

外舅黃浚之先生家傳 文集初編卷五

姨母胡孺人家傳 文集初編卷五

祭和碩慶親王文 文集初編卷六

與陳生柱尊書 文集二編卷四

碩潭詩話序 文集二編卷五

工業專門學校國文成績錄二編序 文集二編卷五

工業專門學校雜誌序 文集二編卷五

許文肅公遺集跋 文集二編卷五

陸成甫先生傳 文集二編卷六

劉佛卿先生神道碑 文集二編卷八

內姊郁氏儀貞殉難記 文集二編卷八

孫君子鈞墓誌銘 文集二編卷八

黃君幼亭墓誌銘 文集二編卷八

龔君紹康墓誌銘 文集二編卷

著 作 年 表

祭尤母趙太夫人文集二編卷九

先儒靜坐集說一卷 六月成
未刊

近思錄劄記思辨錄劄記各一卷 八月成
未刊

中庸大義一卷 十二月成
全書之一

戊午五十四歲

許文肅公外集序 文集初編卷四

唐樊紹述先生附祀西湖白公祠記 文集初編卷六

祭先師王文貞公文 文集初編卷六

夢游詩經館記 文集二編卷三

示郁兒書 文集二編卷四

中學國文新讀本序 文集二編卷五

讀左質疑跋 文集二編卷五

汪君穰卿傳 文集二編卷六

洪君漱霞六十壽序 文集二編卷七

俞君隸雲墓誌銘 文集二編卷八

己未五十五歲

瓶社詩錄序 文集初編卷四

七叔寄亭公家傳 文集初編卷五

宜興蔣孝子碑 文集初編卷六

記義犬 文集二編卷三

與王君慧言書 文集二編卷四

崇正錄序 文集二編卷五

王君丹揆六十壽序 文集二編卷七

莊思謙先生祠堂碑記 文集二編卷八

十三經提綱十三卷 十二月成
全書之一

庚申五十六歲

著作年表

無錫國學專修館學規 文集初編卷二

讀經救國論序 文集二編卷五

無錫秦二孝子傳序 文集二編卷五

高君秋荃傳 文集二編卷六

顧母秦太恭人墓誌銘 文集二編卷八

祭鄧母廉太夫人文 文集二編卷九

辛酉五十七歲

黃元同先生學案 文集初編卷二

施刻十三經序 文集初編卷四

無錫重建尊經閣碑記 文集初編卷六

太倉育嬰堂徵信錄序 文集二編卷五

王文貞公文集跋 文集二編卷五

宗兄郭鄭墓誌銘 文集二編卷八

壬戌五十八歲

周子大義自序 文集初編卷四

二程子大義自序 文集初編卷四

張子大義自序 文集初編卷四

洛學傳授大義自序 文集初編卷四

朱子大義自序 文集初編卷四

曹月川先生集序 文集初編卷四

陸文慎公年譜序 文集初編卷四

守玄閣詩學序 文集初編卷四

說文解字釋要序 文集初編卷四

東林學校陶齋記 文集二編卷三

記黑貓 文集二編卷三

周易故訓訂跋 文集二編卷五

著 作 年 表

著 作 年 表

錢安之先生傳 文集二編卷六

孫有卿先生家傳 文集二編卷六

邵孝子傳 文集二編卷六

胡母顧太夫人七十壽序 文集二編卷七

黃君公續碑 文集二編卷八

宗姪肇農哀詞 文集二編卷九

不忍人之政論三篇 文集三編卷二

政本審六氣論 文集三編卷二

禮治法治論二篇 文集三編卷二

洪範大義三卷 六月成
全書之一

性理學大義十四卷 十二月成
全書之一

癸亥五十九歲

禮始於男女之別論 文集初編卷一

政治學大義自序 文集初編卷四

朱文公集校釋序 文集二編卷五

無錫國學專修館文集初篇序 文集二編卷五

太倉錢氏寧遠義莊碑記 文集二編卷八

章君琴若墓誌銘 文集二編卷八

王君子雲墓誌銘 文集二編卷八

亡聘媳錢氏瑞坤哀詞 文集二編卷九

地方自治論 文集三編卷二

學校論 文集三編卷二

文化論 文集三編卷二

選舉論 文集三編卷二

財政論 文集三編卷二

兵政論 文集三編卷二

著 作 年 表

著作年表

表論文集三編卷二

政治學大義四卷 七月成
未刊

甲子六十歲

天命論三篇 文集初編卷一

書堯典皋陶謨大義 文集初編卷一

周易孔義序 文集初編卷四

重刻朱止泉先生朱子聖學考略序 文集初編卷四

讀文法箋注序 文集初編卷四

紀和碩慶親王事 文集初編卷六

紀翁文恭公事 文集初編卷六

紀王文勤公事 文集初編卷六

紀陸文端公事 文集初編卷六

紀庚子遇匪遇盜事 文集初編卷六

譚叔裕先生墓表 文集初編卷六

朱止泉先生外集序 文集二編卷五

書沈卽山先生詩文鈔後 文集二編卷五

汪君我庾傳 文集二編卷六

陳忠愍公殉難碑記 文集二編卷八

陳君幹丞墓誌銘 文集二編卷八

葛雙生碑銘 文集二編卷八

天地機論 文集三編卷一

外姑黃太夫人事略 文集三編卷七

論語大義定本二十卷 四月成
全書之一

乙丑六十一歲

先考府君事略 文集初編卷五

家祠藏書謹志 文集初編卷五

著 作 年 表

著作年表

家祠藏救生繩謹志文集初編卷五

外祖古愚胡公手蹟謹志文集初編卷五

華君覺堂墓表文集二編卷八

張生光炤哀詞文集二編卷九

蔚蒿哭詩四十九首三月作

續蔚蒿哭詩十一首三月作

軍箴四卷六月成
全書之一

國文經緯貫通大義八卷九月成
全書之一

丙寅六十二歲

與曹君叔彥書文集二編卷四

柏子俊先生文集序文集二編卷五

夏文敬公年譜並遺詩後序文集二編卷五

劉河紀略跋文集二編卷五

滿洲二友傳 文集二編卷六

邵君心炯傳 文集二編卷六

張君拙嘉傳略 文集二編卷六

王君彬儒傳 文集二編卷六

姚君柳屏傳略 文集二編卷六

許君稻蓀傳 文集二編卷六

李母王恭人傳 文集二編卷六

贈蘇寓庸先生序 文集二編卷七

李君遠甫墓表 文集二編卷八

知覺論 文集三編卷一

溧陽張氏宗譜序 文集三編卷五

吳氏宗譜序 文集三編卷五

一粟詩草序 文集三編卷五

著 作 年 表

明刻銅板音論詩本音跋 文集三編卷五

蔡子厚先生家傳 文集三編卷七

朱節母陳孺人家傳 文集三編卷七

劉母陶太夫人家傳 文集三編卷七

榮母石恭人家傳 文集三編卷七

顧君伯圭墓志銘 文集三編卷八

再續蔚蒿哭詩十二首 正月作

茹經堂文集六卷 六月刊成
全書之一

三續蔚蒿哭詩二十八首 十二月作

丁卯六十三歲

王文貞先生學案 文集三編卷一

讀朱子仁說 文集三編卷一

朱柏廬先生學庸講義序 文集三編卷三

讀左研究法 文集三編卷五

陳子遺書序 文集三編卷五

太崑先哲遺書序 文集三編卷五

莊子新義序 文集三編卷五

許復庵文集序 文集三編卷五

張毅盒遺文序 文集三編卷五

太倉胡吟石公傳略 文集三編卷七

汪義門先生家傳 文集三編卷七

汪棣圃先生家傳 文集三編卷七

李頌韓家傳 文集三編卷七

無錫楊君翰西商團功績碑 文集三編卷八

金君鞏伯墓誌銘 文集三編卷八

翁君佩孚墓誌銘 文集三編卷八

著 作 年 表

著作年表

茹經堂奏疏三卷 十二月刊成
全書之一

蔚蒿哀二卷 五月編成

戊辰六十四歲

周易易解序 文集三編卷三

尙書大義自序 文集三編卷三

答胡敬庵書 文集三編卷四

答胡敬庵書 文集三編卷四

沈敬亭先生文稿選序 文集三編卷五

明龔母王太夫人壽詩遺蹟序 文集三編卷五

趙叔寶先生行年紀略後序 文集三編卷五

休寧程氏六烈婦傳序 文集三編卷五

顧辟疆園記 文集三編卷六

華子隨先生家傳 文集三編卷七

郁君佩如傳略 文集三編卷七

秦佩鶴先生墓志銘 文集三編卷八

錢祖耆先生墓志銘 文集三編卷八

孫君鶴卿墓志銘 文集三編卷八

高老愚先生墓志銘 文集三編卷八

殷烈婦熊氏碑銘 文集三編卷八

傅母朱太夫人墓碑 文集三編卷八

家譜世系傳狀藝文志共二卷 正月成
未刊

尙書大義內外篇各一卷 五月成
全書之一

己巳六十五歲

詩經大義自序 文集三編卷三

詩經倫理學序 文集三編卷三

詩經性情學序 文集三編卷三

著 作 年 表

詩經政論學序 文集三編卷三

詩經社會學序 文集三編卷三

詩經農事學序 文集三編卷三

詩經軍事學序 文集二編卷三

詩經義理學序 文集三編卷三

詩經修辭學序 文集三編卷三

婁東孫氏家集序 文集三編卷五

李頌韓養廬詩文稿序 文集三編卷五

勺軒文鈔序 文集三編卷五

杏墩文集序 文集三編卷五

太倉蟹齋記 文集三編卷五

孫君華樓家傳 文集三編卷七

胡君劭介家傳 文集三編卷七

錢君復三家傳 文集三編卷七

高母李太孺人家傳 文集三編卷七

陳節婦王孺人家傳 文集三編卷七

陳君善餘墓志銘 文集三編卷八

黃烈婦李氏碑銘 文集三編卷八

寶母董夫人墓志銘 文集三編卷八

王蔚人哀辭 文集三編卷八

家譜墳墓志 正月成
未刊

論語大義外篇一卷 五月成
全書之一

茹經堂文集二編九卷 十月刊成
全書之一

庚午六十六歲

急救米荒揭 文集三編卷一

上海交通大學第三十屆畢業典禮訓辭 文集三編卷一

著作年表

周易探原序 文集三編卷三

禮記擷要序 文集三編卷三

贈閔君采臣序 文集三編卷四

陽明學術發微自序 文集三編卷五

紫陽學術發微自序 文集三編卷五

錫山秦氏文鈔序 文集三編卷五

沈子培先生年譜序 文集三編卷五

郁佩如拙尊詩稿序 文集三編卷五

勤補齋雜著序 文集三編卷五

施襄臣己巳函關秋振圖序 文集三編卷五

國術進化概論序 文集三編卷五

桐城吳擊甫先生文評手蹟跋 文集三編卷五

鎮洋王紫翔先生文評手蹟跋 文集三編卷五

王紫翔先生書函手蹟跋 文集三編卷五

宗伯子良公積善傳家記 文集三編卷五

朱君蓉舫家傳 文集三編卷七

朱君秀坤家傳 文集三編卷七

傅君耐寒家傳 文集三編卷七

華耀廷先生墓志 文集三編卷八

俞鳳賓墓碑銘 文集三編卷八

李胞與先生墓志銘 文集三編卷八

過智修振災死事碑銘 文集三編卷八

薛母施太夫人墓碣銘 文集三編卷八

太倉九曲鎮楊龔氏焦氏暨二女分媛瑛媛殉難哀辭 文集三編卷八

陽明學術發微七卷 二月成
全書之一

紫陽學術發微十二卷 八月成
全書之一

著作年表

著作年表

辛未六十七歲

廢孔爲亡國之兆論文集三編卷一

克己爲治平之本論文集三編卷一

急救水災議文集三編卷一

續救水災議文集三編卷一

學校當研究水利議文集三編卷一

中庸篇大義下文集三編卷三

儒行篇大義文集三編卷三

答曹叔彥書文集三編卷四

高忠憲朱子節要後序文集三編卷五

讀經誌疑序文集三編卷五

史學鈞元序文集三編卷五

杏墩劄記序文集三編卷五

重建安我叢苑生祠堂記 文集三編卷六

陸母吳太夫人入祀節孝祠記 文集三編卷六

清明掃墓記 文集三編卷六

王晉蕃先生生傳 文集三編卷七

傅君曉淵家傳 文集三編卷七

汪夫人吳氏家傳 文集三編卷七

陝州召公甘棠廟碑 文集三編卷八

雷君補同墓志銘 文集三編卷八

蕭君肖甫墓志銘 文集三編卷八

盧君錦堂墓碑銘 文集三編卷八

王君靄亭墓碣 文集三編卷八

鄉諡惠毅施君左虛墓碑銘 文集三編卷八

戴惠蒼哀辭 文集三編卷八

著 作 年 表

國鑑一卷 十一冊成
全書之一

王申六十八歲

八德詮釋 文集三編卷一

五德箴 文集三編卷一

復胡敬庵書 文集三編卷四

治平統鑑序 文集三編卷五

孔門學史序 文集三編卷五

壬辰殿試策自跋 文集三編卷五

上海交通大學工程館記 文集三編卷六

王申遇盜記 文集三編卷六

烈士尙吉元傳 文集三編卷七

義士美國人蕭特傳 文集三編卷七

廬江徐孝子傳 文集三編卷七

馬君雲亭神道碑銘 文集三編卷八

王君受尹墓志銘 文集三編卷八

袁君汝舟墓誌銘 文集三編卷八

弟婦馬氏殉國難碑銘 文集三編卷八

王申太倉軍民殉難碑記 文集三編卷八

國箴一卷 九月成
全書之一

癸酉六十九歲

禮記大義自序 文集三編卷三

中庸天命章五辨 文集三編卷三

蘇州國學會演講錄 文集三編卷三

宗嫂吳太夫人七秩壽序 文集三編卷四

黃君伯鈞七十壽序 文集三編卷四

覆陳柱尊論格物書 文集三編卷四

著 作 年 表

新安講學第二集序 文集三編卷五

風雨勘詩圖序 文集三編卷五

重印婁東十子詩選跋 文集三編卷五

重建忠義孝悌祠記 文集三編卷六

張天如先生遺像記 文集三編卷六

畢君枕梅傳 文集三編卷七

馮母李太孺人家傳 文集三編卷七

林燮軒先生墓表 文集三編卷八

茹經堂論文一卷 七月成
未刊

詩經大義九卷 十二月刊成
全書之一

甲戌七十歲

周易程傳纂注序 文集三編卷五

張豫泉同年重游泮水詩序 文集三編卷五

劉河保衛團紀功碑 文集三編卷八

張子虞先生墓表 文集三編卷八

蔣君伯言墓誌銘 文集三編卷八

竇生海淳墓碣銘 文集三編卷八

周君敬甫墓碑銘 文集三編卷八

朱君叔子墓志銘 文集三編卷八

宗弟婦陳夫人墓志銘 文集三編卷八

凌夫人石氏墓志銘 文集三編卷八

周易消息大義五卷 二月成
全書之一

禮記大義五卷 二月成
全書之一

民國二十四年三月三十一日出版

茹經先生自訂年譜

全一冊 實價大洋二角

著者 太倉唐文治

發行者 無錫國學專修學校
無錫城內西溪唐宅

印刷者 無錫民生印書館



